

Tutu Nì Tiaa Iin Nèhivì xí Dios nùù Nècuàchì Hebreu

Nì quixi Dèhemanì Dios, nì cachitnùhu-ya xì nèhivì ñuhiví ñà-ndiùú palabra xi Yua-yá

¹ Sàhaha na cuní Dios càhàn-yá xì xì-ndà, nìsa techuún-yá iin nèhivì ñà-cachitnùhu-ne xì nècuàchìmà palabra xi-ya. Cuàhà gá xichi nì quida-ya ducán, te cuàhà gá ejemplu nìsa xichuún-yá na ní cachitnùhu-ya palabra mà.

² Doco quivì vichi na cuàhàn xìnu tiempu, Dèhemanì-yá nduú ana nì techuún-yá càhàn xì-ndà. Vàchi sàhà ndahà fuerte Dèhemanì-yá nì quidavàha-ya nsidanicuú ñuhiví iá, te nì chitnùní stná ini-yà ñà-divi Yà-mà cunduu ana nìhìtáhvi dandacú sàhà nsidaámà.

³ Cunaha-nsiá, nacua ndiaha gá mii-yá, ducán ndiaha stná Dèhemanì-yá, na ian nduà-yá nduú Yà-mà, vàchi iin-ni nacua iá-yà, divi ducán iá stná Yà-mà. Te Yà-mà, sàha-ñá fuerte dandacú ndiaha-yá, ñàyùcàndùá quidáchúûn ví nsidanicuú ñà-iá ñuhiví. Te na ní nsihì nì nsidan-doo-ya cuàchi-nda, dandu mànuhù-yá ansivi, te nì sàcòo-ya ladu cuàhá Yuandiáhá-yâ.

⁴ Ñàyùcàndùá, chicá más ndiaá-yà nùù nsidaa ángel, vàchi nì chitnùní ini Yuamáni-yá ñà-cachi-ndà xì Jesús Dèhemanì-yá, te ñà-yòhó nduú ñà-chicá ndiaá nùù nsidaa ñà-nduá cachí-ndà xì iin ángel.

⁵ Vàchi còò ni-iin ángel nì níhìtáhvi cachi Dios xì-né dohó:

Dèhemanì nduu-ní: vichi sà-ìtiácù-ní nì quide.
(Còó, có-càchí-yà ducán xì ni-iin ángel.)

Daaní, inga xichi dohó nì cachi stná-yà (sàhà Jesús):

Na quidá iin yua, ducán icúmí quide xì mii-yá; te
mii-yá, na iin dèhi cunduu stná-yà nùí.
(Ni cónì cachí Dios ducán xì ni-iin ángel.)

⁶ Daaní, nì chitnùnì stná ini-yà quesaa
Dèhemanì-yá ñuhiví yohó, te quìvì nì cuu ducán,
dandu nì cachi-yà (xì nsidaa ángel xi-ya):

Nsidaa nsiohó ana nduú ángel xi, icúmí-ndá
cahvi-ndá Dèhemanì yohó.

⁷ Doco na ní càhàn-yà sàhà ángel mà, dohó nì
cachi-yà:

Nì quidavàha-ya ángel xi-ya (ñà-cacanu u yàchì-nè)
nahi tàchì; vàchi nahi mozo xinúcuáchí
nùù-yá nduú-né (sáha-ne castigu xi-ya)
nahi ñuhu xíxìn.

⁸ Doco na ní càhàn-yà sàhà Dèhemanì-yá, dohó nì
cachi-yà:

Dios nduu-ní, te nicanicuahàn icúmí-ní
cusahnu-ní; te micuísi modo viì icúmí-ní
dandacu-ní nùù nèhivì.

⁹ Cuú ndisa inì-ní sàhà nsidaa ñà-ìá viì, doco
có-cúú dahuun inì-ní ni-iyuhu sàhà cuàchi.
Ñàyùcàndùá, nùù mii-yá ana cahvi-ní sàni
nìhìtáhvi-ní ñà-cudiì cuáhà inì-ní; cunaha-ní,
chicá icúmí-ní cudiì inì-ní nùù nsidaa gá ana
cutnáhà xí-ní.

¹⁰ Daaní, (inga xaan nacání nansa nì cachi stná
nèhivì na càhàn-nè xì-yá):

Stoho-nsì Señor, sàhaha nì quidavàha-ní ñuhìví.
 Ndahà mii-ní nì cuàha stná nsidaa sítnúù
 itándiaa ansivi.

¹¹ Te mate nsidaájàn icúmíâ nsiha, doco mii-ní,
 còó; nicanicuahàn icúmí-nî coo-ní. Nsidaa ñà-ìá
 ñuhìví, icúmíâ ndutuhá, na ian sícoto.

¹² Te na ian nacáhnù vî nèhivì iin dùhnù-né, ducán
 icúmí-nî quida-ní xì ansivi, vâchi icúmíâ nadàma,
 na ian nadama-nda ñà-ndixì-ndà. Doco mii-ní,
 còó. Iin-ni icúmí-nî coo-ní; mà nunca sàà quivì
 ndañuhu-ní, nì cachi-nè.

¹³ Doco Dios, cóni càchí-yà xì ni-iin ángel palabra
 yohó; (cuisì mii Dèhemanì-yá nì cachi xì-yá dohó):
 Yohó coo-ní ladu cuahí ndè cachi sàà cundeí nùù
 nsidaa ana xiní ùhì xì-ní; dandu cusahnú
 fuerte-ní nùù-né, nì cachi-yà.

¹⁴ Vâchi ángel, ináhá-ndá ñà-cuisì espíritu
 vî xinúcuáchí nùù Dios nduú-né; ndacú-ní
 núù-né ñà-cacanu-u-ne cunucuachi-né nùù-yá,
 te chindee-né nsidaa ndohó nèhivì icúmí càcu
 anima-xi.

2

*Màsà nunca nandòdó-nda gracia xi-ya
 ñà-cùnì-yà dacácu-ya anima-ndá*

¹ Sàhà nsidaájàn, cuàhà gá xiñuhu cunihnu vâha
 ini-ndà razón ndiaha sàni xinitnùhu-nda, còtó
 cueé-ni cueé-ni tucù-ndà inga ichì.

² Vâchi ley sàhaha, mate cuisì ángel nduú ana nì
 cachitnùhu xi-nda sàhà-ñá, doco fuerte nì sandiaa
 stná, te nècuàchì cóni ndúlócô sàhà-ñá, iin castigu
 cahnú nì ñhì-né nacua ndiá ìcà cuu xi nsidaa
 nèhivì có-inínì.

³ Ñàyùcàndùá, ndohó nècuàchì (tiempu vichi), ¿nansa cui càcu stná-ndà nú màsà quíhín casu-ndà sàhà palabra ndiaha cachí nansa càcu-nda? Vàchi divi Stoho-ndà Señor nduú ana primeru nì cachtitnùhu palabra mà, dandu después nì xinitnùhu stná ndohó nì quida nèhivì nì inini nì càhàn mii-yá.

⁴ Te nì chindee stná Yua-nda Dios sàhà-ñá cundaà ini-ndà divi ñà-ndàà nduámà, vachi nì quida-ya nsidanuu clase milagru ndiaha, te nì sàhatahvì stná-yàndó Espíritu ìì xí-yá; (te vichi) cuàhà gá ñà-ndiaha ìì quidá Espíritu ìì sàhà-ndà según nansa cuní Yua-nda Dios.

Nansa nì nanduu Jesús nahi nèhivì, te ducán nì ñihì-yá nansa dacácu-yàndó

⁵ Cunaha-nsiá, sàni cachì xì-nsiá sàhà inga ñuhivì vaxi xi-nda. Doco màdì ángel cunduu ana cusahnú nùá, vachi cóni chítñuní ini Dios ducán.

⁶ Nùù tutu ìì iá ndé nì càhàn iin nèhivì (xì-yá), te dohó nì cachi-nè:

Nèhivì ñuhivì, có-ndiàá guâ-nè, doco nihnú inì-nínè. Còò necesidad icúmí-ní ñà-nsinuu inì-ní nèhivì ñuhivì, doco divi nduá quida-ní.

⁷ Te sàni chitnùnì stná inì-ní ñà-sàhà sacu quivì mà-sàà nèhivì ñuhivì ndudava-ne xì ángel xi-ní. Te nì nihítàhvì stná-nè cuàhà gá tñùñuhu ndiaha nì quida-ní. Te nì chitnùnì stná inì-ní ñà-cusahnú-né nùù nsidaa ñà-ndùá nì quidavàha-ní.

⁸ Nsidanicuú iñàha, vètùnì dandacú-né nùá nì quida-ní. Ducán cachá.

Pues nú ducán sàni nihítàhvì nèhivì quida-ne, dandu nsidanicuú iñàha, mà cúí ndòo uan iladu, fuerza icúmí-nè dandacú-né nùù nsidanicuú

iñàha. Doco quivì vichi nàhà xicà, tàñáha ga sàà quivì dandacú ndisa-ne nùù nsidaa ñà-jaàn.

⁹ Doco Jesús, ndisa, sàni cundaà vaha ini-ndà sàhà mii-yá, cuahà gá tnũñuhu ndiaha sàni nanihì-yá. Vàchi sacù-ni quivì cóni ndúdává-yá xì ángel, doco sàhà gracia xì Dios nì ndoho-ya, te nì xihì-yà sàhà nsidaa-nda, te sàháyucànduá nì nanihì nsihí-yá tnũñuhu ndiaha xí-yá.

¹⁰ Dios nduú ana nì quidavàha xi nsidanicuú ñà-ia. Te sàhà ñà-nì còò más tnũñuhu xí-yá, ñàyucànduá nì sàcòò nsidaámà. Doco cuní stná-yà cundoo cuahà dèhe-ya gloria xi-ya. Ñàyucànduá, nì chitnùnì ini-yà ñà-ndoho Jesús, vachi ducán nduá xiñuhu cuu xi-yá sàhà-ñá ni cuácátnáhâ nsidaa ñà-nduá icúmí cuu xi-yá. Ñàyucànduá, sàhà-ñá nì ndoho-ya ducán, ñà-jaàn nì nihì-yá salvación xi-nda.

¹¹ Te cunaha-nsiá, mate divi-ya nduú ana ndiaha dandúhì xì anima-ndà, doco iin-ni Yuamánì-yá icúmí-yâ nahi ndohó. Sàháyucànduá có-cùcáhán núù-yá cachi-yà xì-ndà ñà-nduù-ndà nahi tnaha-ya.

¹² Vachi (nùù tutu ì) dohó cachí-yà (xì Yuamánì-yá):

Na natácá tnahi, dandu icúmí nacani xì-né (ñà-ndiaha guá) iá-ní, te coto stnái alabanza nùù-ní, cachí-yà.

¹³ Daaní, inga xaan cachí stná:
Yùhù icúmí cahvi xì mii-yá.

Te inga xaan cachí stná:
Cundehè-nsiá, yohó iá stnái xì nèhivì nì chitnùnì ini Dios cunduu (nahi) dèhi.

14 Pues sàhà-ñá nduu-nda dèhe-ya, te iá iquicúñú-ndà, ñàyùcàndùá stná mii-yá, nì nìhì stná-yà iin iquicúñú (nahi ndohó), te ducán nì nìhì-yá nansa cui-yà. Ñàyùcàndùá, sàhà-ñá nì xìhì-yà, vátùni nì cundee-yá nùù ñà-malu, vàchi quisi jaàn nìsa dandacú sàhà-ñá cui nèhivì ñuhivì.

15 Te nèhivì, yúhì sàstnùhù-né cui-nè, ñàyùcàndùá, mà úhì dandacú-si nùù-né inii vida xi-ne. Doco vichi (sàhà-ñá nì cundee-yá nùù-sí), vátùni cuidahan-yándô nùù ndahà-sí.

16 Vàchi màdì ángel nì cùhí ini-yà na ní quixi-ya ñuhivì yohó; còó. Divi ndohó nècuàchì descendencia xi Abraham nì quixi-ya nì chindee-yá.

17 Ñàyùcàndùá nì xiñuhu nanduu-ya iin tiàa; meru nacua ndáa nèhivì ñuhivì yohó, ducán nì nanduu-ya, na iin tnaha-ne. Te sàhà ñà-jaàn vátùni nì sàcùnduu stná-yà nahi dùtù xi-nda nùù Dios, vátùni cahvi-nda xi-yá ñà-cundehè ndàhvì-yándó. Te sàhà stná nì nanduu-ya iin tiàa, vátùni nì dànàa-yá sàhà cuàchi-nda, te ducán mà níhì gá-ndà castigu sàhà cuàchi-nda.

18 Te sàhà-ñá nì yàha stná-yà cuàhà vida na ní ndoho guá-yà, ñàyùcàndùá vátùni chindee stná-yándó na quivì yàha stná-ndà tnùndoho.

3

Chicá ndiaá Jesús nùù Moisés mate ndahà nècuàchì mà nì quixi ley sànahà

1 Cunaha-nsiá, iin-ni xínduu-nda nèhivì ì xí Dios, te iin-ni sàni cana stná-yándó ñà-sàà-ndà gloria xi-ya, ñánì. Ñàyùcàndùá, sàhà nsidaájàn nicanicuahàn xiñuhu cunihnu vàha ini-ndà Jesús,

vàchi mii-yá nduú ana cahvi-nda, te divi stná-yà nduú ana nì techuún Dios ñà-quixi nùù-ndà, te nì sàcùnduu-ya dùtù xi-nda.

² Te na ní techuún Dios-yà quixi-ya, dandu nì quida ndisa-ya cumplir nsidaa ñà-nduá nì sàcùnaha-yá, nacua nì quida stná Moisés sànahà na ní sandiaa-nè nèhivì xí-yá.

³ Doco chicá más tnũñuhu icúmí Jesús nùù Moisés mà. Vàchi ducán nduá na ian cuáha iin vehe, cuiñi tnũñuhu xí ana nì quidavàha xán nduá queé, màdi tnũñuhu xí miá.

⁴ Te iin iin vehe, iá ana nì quidavàha xán, doco nsidanicuú ñà-íá ñuhiví, cuiñi Dios nduú ana nì quidavàha xán.

⁵ Ñàyùcànduá, ducán nìsa quida vii Moisés sànahà, nì sandiaa-nè nèhivì xí Dios na iin nècuàchì xinúcuáchí (nùù-yá); te chuun xi-ne nì sanduu stná ñà-cáhàn-nè sàhà palabra icúmí Dios datúi-ya después.

⁶ Doco Cristu, (tucu iá xì mii-yá, vàchi) Dèhemanì Dios nduú-yá. Te quidá víi stná-yà (nahi Moisés), doco chuun xi-ya nduá ñà-dàndàcú-yá nùù nsidaa nèhivì xí Yuamánì-yá. Te divi nèhivì xí-yá sànduú stná ndohó nú màsà yúhî-ndà, te iin-nì nì cúdîi ini-ndà cahvi-nda xi-yá dècuèndè na sàà xínu tiempu.

Nansa sàà nèhivì xí Jesús ndé ía descansu ndiaha xí-yá

⁷ Ñàyùcànduá, xiñuhu quida-nda nacua cachí Espíritu ìi xì-ndà nùù tutu ìi ndé cachí-yà: Vichi sacúndáhvî nùù-nsiá ñà-nì cúnínì-nsiá ñà-nduá dandacú Dios.

⁸ Màsà quídámáxìní-nsià na ian nìsa quida xì-nsiá sàhana na ní xìca-ne yucù dànà. Cuàhà gá nì dàcuídà ini-nè yùhù, ndè nì nanduu-ne nahì contra xi.

⁹ Te ùi dico cuià nì xini nècuàchìmà milagru ndiaha nì quide xì-né; doco còó, iin-ni nì quida canúú-né (ñà-nduá dàcuídà ini xì).

¹⁰ Ñàyùcànduá, yáha ga nì cuduchi inì sàhà nsi-daa-né, te nì cachi: “Cutu cuní nècuàchìmà tùcù-nè inga ichì; mà túha-ne cunchicùn vii-né ichí”.

¹¹ Ñàyùcànduá, nì xidà inì; ndee ní cachì xì-né palabra yohó, te mà dámíà: “Mà nunca cuàhi yàha-ne (lugar ndiaha xí) ndé cundoo-ne descansu nì cùí”. Ducán nì cachi Dios.

¹² Ñàyùcànduá, cuidadu ni cúndóó-nsiá ñànì, còtó coo iin-nsia nacání chicuéhè inì-xi, te nandòó-nsiáyà, có-xìníndísâ gá-nsiáyà, mate Dios iá nicanicuahàn nduú-yá.

¹³ Sàhájàn nsìquívì xiñuhu nacuahandee stnahá ini-ndà, mientras iá va tiempo vichi, còtó sàà-ndà cunduu-nda nècuàchì quídámáxìní, vàchi mà úhì dandahví cuàchi-nda ndohó, te cuu xi-nda ducán.

¹⁴ Vàchi cunaha-nsiá, cuisì nú iin-ni nì cunchicùn vii-ndâyá ndè xìnu tiempo, te cunihnu vaha ini-ndâyá nacua nì quesaha-nda, dandísá sàà-ndà nìhítáhvi-ndà cundoo-nda nùù Cristu.

¹⁵ Ñàyùcànduá, dohó cachí-yà (nùù tutu ìì):

Vichi sacúndáhvi nùù-nsiá ñà-nì cúníní-nsiá ñà-nduá dandacú Dios. Màsà quídámáxìní-nsià na ian nìsa quida nècuàchì sàhana, te cuàhà gá nì dàcuídà ini-nè yùhù, cachí-yà.

16 Te ¿indù nèhivì nduú nècuàchì nì inini xi (palabra xi-ya), te después nì cahíchì ini-nèà? Pues divi nsidaa nècuàchì nì tavà Moisés ñuu Egipto yucán.

17 Te ¿ana divi nduú nèhivì nì cuduchi guá ini Dios sàhà-xí inii ùi dico cuià mà? Pues, divi nècuàchì cuàchi ma, te ñàyùcàndùá dìsàhà-xí nì xihì-nè yucù dàná mà.

18 Te ¿amádi divi-ni stná-nè xínduu ana nì càhàn ndee guá-yà sàhà-xí ñà-mà yáha-ne lugar xi-ya ndé nìhì-né descansu nì cui? Pues jaan, vàchi nècuàchìmà, cóni cùnì-nè cunini-neyà.

19 Ñàyùcàndùá, vètùnì cundaà ini-ndà, divi sàhà-ñá cóni cùnì-nè cunindisá-né, ñàyùcàndùá màni cui yáha-ne (lugar ndiaha ma).

4

1 Doco cunaha-nsiá, vichi iá va nansa cui sàà-ndà lugar ndiaha xí-yá nacua nì cachi-yà xì-ndà. Ñàyùcàndùá, cuidadu ni cúndóó-nsiá còtó ndañuhu-nsiá ichì sàni tñii-nsia cuàhàn-nsià cundoo-nsia nùù-yá ducán.

2 Vàchi nùù ndohó sàni cachitnùhu-ne ñà-ndùú razón ndiaha xí-yá davani nacua nì cachitnùhu stná-nè xì nèhivì sàhana ma. Doco mii-né, cóni níhì-né ni-iin provechu nùù palabra mà, vàchi mate ní xinitnùhu-ne, doco cóni xínindísâ-né.

3 Doco ndohó nècuàchì xinindísâ, vètùnì sàà-ndà ndé iá descansu ndiaha ma, vàchi (mà níhitàhvì gá nècuàchì sàhana ma, vàchi) dohó nì cachi-yà:

Yùhù, nì xidà ini; ndee ní cachi xì-né iin palabra, te mà dámíà: mà nunca cuàhi yáha-ne (lugar ndiaha xí) ndé cundoo-ne descansu nì cui.

Ducán nì cachi Dios, vàchi dècuèndè tiempu nì quidavàha-ya ñuhiví sàni xínu chuun xi-ya.

⁴ Vàchi nùù tutu ìì iá ndé cachí nansa (nì quida-ya) quìvì ùsà; te dohó cachá`:

Quìvì ùsà nì quetatu Dios, vàchi sàni xìnu nsidaa chuun nì quida-ya.

⁵ Daaní, iá stná ndé cachí stná-yà inga palabra yohó nùù tutu mà:

Mà nunca cuàhi sàà nècuàchìmà lugar ndiaha xí ndé cundoo-ne descansu nì cúí.

⁶ Pues (náhà xicà) fuerza icúmí cundoo dava nèhivì lugar ndiaha ma, doco nèhivì nì inini xì razón ndiaha primeru mà, cóni níhì-né sàà-nè cundoo-ne yucán, vàchi cóni xìnínídsâ-né.

⁷ Sàhà ñà-jaàn nì cachi stná-yà inga palabra después: vátùni iá inga tiempu vàha, cachí-yà, divi nduú quìvì vichi. Vàchi nì yàha inga caní tiempu, dandu nì tiaa stná Davíd inga palabra xi Dios. Divi nduú palabra làcà (nì tiaí nùù tutu yohó) ndé cachí-yà:

Vichi sacúndáhvî nùù-nsiá ñà-nì cúníní-nsiá ñà-ndùá dandacú Dios. Màsà quídámáxìní-nsiá, cachí-yà.

⁸ Daaní, después nì sàà stná Josué (cusahnú-né nùù nèhivì sàhana ma, doco) ni sàhà mii-né cóni níhì nècuàchìma descansu ndiaha ma. Vàchi nú jaan, dandu mà cáchí Dios coo inga quìvì (cui níhì-ndà descansu mà) después.

⁹ Doco divi sàhà ñà-jaàn vátùni cundaà ini ndohó ana nduú nèhivì xí Dios ñà-íá va iin lugar ndé cundoo-nda quetatu ndiaha-nda.

¹⁰ Vàchi cunaha-nsiá, nú sàni níhì-ndà descansu mà, dandu ñà-sàni nsihi chuun xi-nda (ñuhivì yohó) cundua, divi nacua nì ìa stná xì mii-yá na ní xìnu chuun nì quida-ya, nì quetatu-yà.

11 Ñàyùcàndüá, xiñuhu ñà-cuàhandee ini-ndà sàà-ndà lugar ndiaha ma ndé nìhì ndisa-nda descansu, còtó quida-nda nacua nì quida nèhivì sàna ma, cónì xìníndísâ-né.

12 Vàchi cunaha-nsiá, cahnú poder xi palabra ì xí Dios. Na ian itiácüà, teayùcàndüá (våtùni sáà yàchà ndè chicá ini anima-ndà) na ian nduá iin espada dìn ndùì ladu-xi, doco palabra mà, chicá fuerteà nùù iin espada, vachi dècuèndè meru espíritu xi-nda sáà stná, xì dècuèndè stná chicá ini sàxìnítnùnì-ndà. Te divi sàhà palabra mà våtùni cunahà claru nansa nacánì ndisa ini-ndà, xì nansa nihnú stná ini-ndà quida-nda.

13 Cunaha-nsiá, còò ni-iñàha cui coo dèhé nùù Dios; vachi nùù mii-yá túi claru nsidanicuú iñàha, te indéhe stná-yà nsidaa ñà-ndüá quida-nda, dandu después divi nùù mii-yá icúmí-ndá nacua-nda cuenta.

Jesús nduú dùtù ndiaha xi-nda

14 Dèhemanì Dios nduú Jesús, te vichi sàni nasaa-yà nùù Yuamánì-yá iá ansivi; dùtù ndiaha xi-nda nduú-yá vichi, ñàyùcàndüá iin-ni ni cúnchícùn viì-ndà ichì-yá nacua sàquidà-ndà vichi.

15 Vachi mii-yá, våtùni cuhi ndisa ini-yàndó na yàha-nda tnùndoho, vachi cuàhà gá iñàha sàni yàha stná mii-yá, doco cónì quidá-yá ni-iin cuàchi.

16 Ñàyùcàndüá, màsà yúhì-ndà càcàn tàhvì-ndà nùù-yá, vachi yucán iá-yà nùù silla ndiaha xí-yá ndé sáhatahvì-yá gracia xi-ya. Vachi icúmí-yá cundehè ndàhvì-yàndó, te quida-ya gracia mà sàhà-ndà na meru xiñuhá.

5

¹ Nsidaa dùtù ñuhíví yohó, chuun nì nihì-né nduá ñà-cáhàn-nè sàhà nèhivì nùù Dios, te dócò stná-nè promesa xi nèhivì nùù-yá. Stná promesa icúmí coco nùù-yá, icúmí-né cahmi stná-nè nsidaámà sàhà cuàchi nèhivì.

² Te sàhà-ñá nduú stná-nè iin ana iin-ni ndohó nahi ñanitnaha-xi, vátùni cuhi ini-nè nèhivì dava ga nú có-sâà nècuàchìmà cundaà vàha ini-nè, te ò nú sàni quee-ne ichì váha.

³ Doco sàhà-ñá nduú stná dùtù mà nèhivì ùún, ñàyùcànduá icúmí-né cuàha stná-nè promesa sàhà cuàchi mii-né nacua quidá-né sàhà nèhivì dava ga.

⁴ Te màdì mii dùtù nácàxin-ne mii-né ñà-nihì-né chuun ndiaha ma; còó. Cuisì Dios nácàxin xi-né, na ian nì quida-ya xì Aarón sàhaha.

⁵ Pues, ducání stná Cristu, màdì mii-yá nì càchí-yà cunduu-ya dùtù sàhà-ñá chiigá tavà-yá tnùñuhu xí mii-yá; còó. Divi Yuamánì-yá nì sàha xi-yá chuun ma, vàchi dohó nì cachi yàmà xì-yá: Mii-ní nduu-ní Dèhemanì; vichi sà-ìtiácù-ní nì quide.

⁶ Te divi ducán nì cachi stná-yà inga xaan xí tutu ìì mà:

Nicanicuahàn cucumi-ní chuun cunduu-ní nahi dùtù, nacua iá chuun xi (dùtù sàhaha nani) Melquisedec, nì cachi Dios.

⁷ Vachi (iin xichi) na iá va Jesús (ñuhíví yohó) nahi tiàa, dandu nì xicàn tàhvì fuerte-yà nùù Yuan-diaha-yá Dios, vàchi sàhà-yàmà vátùni càcu-ya ñà-màsà cúí dahuun-ya. Cuàhà gá nì sacundahví-yà, dècuèndè nì sacu stná-yà; te sàhà-ñá nihnú ndiaha guá ini-yà, ñàyùcànduá nì cuhi ini Yuandiaha-yá mii-yá.

⁸ Cunaha-nsiá, mate meru Dèhemanì Dios nduú-yá, doco nì quida stná-yà tocar ndoho stná-yà sàhà-ñá cundaà vaha ini-yà nansa iá ñà-nchícùn-ndà nsi-daa ñà-ndùá nì ndacu nuù-yá.

⁹ Daaní, na ní nsihi nì ndoho-ya, dandu sà-íá, nicanicuahàn vètùni dacácu-ya nsidaa nèhivì iníní xí-yâ.

¹⁰ Vàchi sàni cachi Yuamánì-yá ñà-mii-yá cundu-ya dùtù chicá ndiaá, te quida-ya chuun xi dùtù na ian nìsa quida Melquisedec mà (sàhana).

Ndahví nsidaa nèhivì nacóó xí ichì Jesús

¹¹ Cunaha-nsiá, iá cuahà gá ñà-cùnì cachi xì-nsiá sàhà chuun yohó, doco ùhì chinahì mii-nsiá sàhà-ñá vichi, vachi ùhì sàà-nsiá cundaà vaha inì-nsia,

¹² mate vichi sàni sàà tiempu ñà-chinaha mii-nsiá dava ga nèhivì nì cùí, doco còó, xiñuhu ì ñà-danácuáhâ gá nèhivi mii-nsiá ndè palabra chicá mà úhì xi-ya. Vachi nahi ñà-cuati nduú-nsiá, nahi ana tà cùtùha cuxi comida fuerte, nahi mée chichi ì nduú-nsiá.

¹³ Vachi nèhivì tà cùtùha viì nansa cuní cachi palabra xi ichì váha-ya, nahi mée xínduu-ne, na ian tëndodo itiacù-va-ne.

¹⁴ Doco nèhivì sàni cutùha nacuni índù ichì nduú ichì váha, pues nahi nècuàchì sahnú xixí xi comida fuerte xínduu-ne, vachi sàni sàhandee ínì-nè cutùha vaha-ne índù-ñá iá vaha, te índù-ñá có-íá vaha.

6

¹ Ñàyùcàndùá, xiñuhu cundu-nda nahi nècuàchì sahnú, te cutùha-nda palabra chicá nchichí xi

Cristu, màdiá cuisì dàñhùhù chicá sencillu cuni-hnu ini-ndà nicanicuahàn; còó. Màsà ndésáhá tú-ndá xí palabra primeru, vàchi sàni cundaà vaha ini-ndà sàhà palabra mà, ináhá-ndá nacáníá nansa naxicocuín ini-ndà sàhà cuàchi-nda ñà-còò chuan. Te sà-ináhá stná-ndà nansa icúmí-ndá cunihnu vaha ini-ndà Dios,

² xì nansa cuhii-ndà, xì nansa chitandòò-ndà ndahà-ndà dìni nèhivì (na xícàn tàhvì-ndà sàhà-né). Te sà-ináhá stná-ndà nansa icúmí nsii natiacu-nè, xì nansa icúmí coo stná juicio final.

³ (Doco cumáni gá ñà-ndùá xiñuhu cundaà ini-ndà sàhà-xí.) Ñàyùcàndùá, cahnú gá Dios icúmí-ndá quida-nda seguir (ndè cachi ndufuerte fe xi-nda).

⁴⁻⁶ Vàchi nú sàni dàtnùù Dios sàxìnítùnì iin nèhivì, te después sàà-nè nacoò-ne (ichì ndiaha ma), dandu mà cúí gá sàà-nè naxicocuín ini-nè inga xichi sàhámà. Vàchi sà-ináhá-nè nansa iá ñà-nìhítàhvì ndiaha-nda nùù Dios, te sàni xini stná-nè nansa iá ñà-cucumi-nda Espíritu Ìì xí-yá. Ndè ináhá stná-nè ñà-ndiaha guá iá palabra ìì xí-yá, te ini anima-nè sàni xini stná-nè milagru xi-ya nahi milagru xi inga ñuhivì vaxi xi-nda. Doco (ndahví-nè) nú sàni nacoò-ne ichì mà, vàchi cuní cachàmà na ian nì nachituu-ne Dèhemani-yá nchìca cruz inga xichi tu, te nduú stná na ian sácùndiaa vate-néyà.

⁷ Ñàyùcàndùá, (ducán icúmí cuu xi nècuàchìmà nahi ejemplu sàhà) ñuhù xi-nda, vàchi nú sàni cuun ndiaha dàvì, te nì ndèe cunú ndèhì, dandu (tuxí ini-ndà) cuàhàn cundiatú-ndà, ádi cuàha vii itu-ndà. Te divi ducánì stná xì nèhivì. (Nú iin-ni

nchícùn vii-né mii-yá), dandu vátùni cundiatú anima-nè.

⁸ Doco nú (nacoo-ne ichi-yá), dandu cunduu-ne nahi ñuhù ndé cuisì sahnú yùcù iñu, ò yùcù chicuéhè, vàchi mà ndéé vaha-ne nuù-yá, te vichi sà-ítúú ñhì-né iin castigu cahnú, te fin xi-ne cunduu ñà-coco-ne.

⁹ Doco tucu icúmí cuu xi mii-nsiá, ñani màní, ináhî, mate sàni cachì xì-nsiá ñà-nduá ñi cachì. Vàchi seguru icúmî mii-nsiá ñà-cundiatú anima-nsiá, te càcu-nsiá.

¹⁰ Vàchi vaha Dios, te mà nándodó-yá obra sàni quida-nsiá; ni mà nándodó stná-yà nansa cuú guá inì-nsiá sàhà-yá, te sàhàmà ñi chindee-nsiá dava ga nèhivì xí-yá; te dècuèndè vichi chindéé ñi-nsiánè.

¹¹ Te nsiuhù, cuní-nsi iin-ni ñi cúnsîhi inì-nsiá quida-nsiá ducán ndè quivì último sàhà-ñá cucumi-nsiá seguru cuàhàn-nsiá ñihítàhvì ndisa-nsiá ñà-ndiaha ñi ndiatu-nda.

¹² Màsà cúdúsán-ndá; còó. Iin-ni ñi cúníndísá-ndá, te quida ndee ini-ndà nacua ñisa quida nèhivì sàni ñihítàhvì ñà-ndiaha ñi ñi cachi-yà xì-ndà.

Iin tnùndé ini ndiaha icúmí nsidaa nèhivì xí Dios

¹³ Na ní saquin Dios compromisu xì Abraham sàhana, ñi cachi-yà xì-né: “Yùhù chináhî mií”. Ducán ñi cachi-yà, vàchi còò cá inga ana chicá ndiaá nuù mii-yá.

¹⁴ Te ñi cachi stná-yà xì (Abraham) yucán: “Seguru icúmí cundiatú anima-ñi quide; te cuàhà gá descendencia xi-ñi icúmí cundoó”.

15 Ñàyùcàndüá, ducán nì sandiatu cuéyàà nècuàchìmà dècuèndè nì sàà quìvì nì nìhì-né ñà-ndüá nì cachi Dios xì-né.

16 Nèhivì ñuhiví yohó, nú cuní-nè caquin fuerte-nè iin compromisu, dandu ndácùcahan-né quìvì iin ana chicá ndiaá nùù mii-né, (nahi Dios), te nú sàni chinaha-né mii-yá, dandu sà-ìá, icúmí-né nacahan-né Dios.

17 Ñàyùcàndüá, na ní quida Yua-nda Dios comprometer ñà-ìcúmí-ndá nìhìtáhvi-ndà ñà-ndiaha ìi xí-yá, dandu nì ndacùcahan-yá mii-yá, vèchi cuní-yà cundaà vaha ini-ndà iin palabra mà-dáma ndüá nì cachi-yà.

18 Ducán dandu ùi palabra nduámà, (dihna cuisì-ní nì cachi-yà, dandu después nì chinaha-yá mii-yá), ñàyùcàndüá, nicanicuahàn icúmí cundiaa palabra nì cachi sahnú-yá mà; mà nunca dandahví-yándó, seguru icúmí coo tnùndé ini fuerte xì nsidaa ndohó nècuàchì cundéé inì-xi ñà-dacácu-yándó, te sàni cahvi stná-ndà xì consuelu ndiaha sáhatahvi-yá.

19-20 Te consuelu mà, vètùni chindeá anima-ndà, vèchi có-ndüá tnùhu; ñà-seguru ndüá. Vèchi dècuèndè lugar ndé (chicá inì-xi vehe ìi Dios ansivi), yucán sàni nansihvi Jesús, nì yàha-ya nùù ñà-sadí nihni nùù-ndà yucán, te dècuèndè lugar mà sáhatahvi-yándô tnùndé ini mà, vèchi dihna-ya nì sàà-yà yucán ñà-càhàn-yà sàhà-ndà. Vèchi vichi sàni nìhì-yá chuun cunduu-ya dùtù xi-nda, te nicanicuahàn icúmí-yâ quida-ya chuun ma, divi nacua nìsa quida Melquisedec sàna.

Nahi chuun xi dùtù nani Melquisedec, ducán nduú chuun quidá Jesús vichi

¹ Nècuàchì dandacú nùù ñuu Salem nì sanduu Melquisedec mà. Te nì sanduu stná-nè dùtù xi Stoho-ndà Dios, divi ana dandacú ndè chicá ansivi. Te divi-ne nì quee nì nanchìcùn ìchì xì Abraham na mándixi nècuàchìmà nì sàhàn-nè guerra nì cundee-né nùù cuàhà rey, dandu nì quee Melquisedec mà nì dàhû-ñánê.

² Te nì sàha nècuàchìmà-né diezmu sàhà nsidaa ñà-nduá nihí-né. Te quìvì Melquisedec mà, cuní cachà “rey ndàcuìsì inì-xi”. Te ñà-nduú stná-nè rey xi ñuu Salem yucán, ñàyùcànduá cuní cachi stná quìvì mà “rey xi ndé iá paz”, vàchi quìvì Salem mà, cuní cachà “iá paz”.

³ Te cunaha-nsiá, còò (ndé nacání sàhà) yuadíhí-nê, ni (sàhà) yohòtéhè-né, ni nansa nì tùinuù-né, ni nansa nì xìhi-nè; ñàyùcànduá, ducán queámà na ian nicanicuahàn quidá-né chuun xi dùtù nacua quidá Dèhemanì Dios.

⁴ Pues na cahnu-guá iá chuun nì nihì Melquisedec sàhaha ma, vàchi dècuèndè stná yua raza-nda Abraham nì sàha xi nècuàchìmà diezmu, divi diezmu nì tavà-né nùù ñà-cuicà nì nihì-né na ní sàhàn-nè guerra.

⁵ Daaní, después nì sàà iin tiàa nani Leví nì nihì-né chuun ñà-cunduu stná-nè dùtù, mii-né xì descendencia xi-ne. Te nì sàcùnaha nsidaa-né tavà-né diezmu nùù ñànìtnaha-ne raza-nda nacua cachí ley ì. (Ñàyùcànduá, ducán nì quida-ne) mate iin-ni descendencia xi Abraham nì sanduu stná nsidaa ñànìtnaha-nemà.

⁶ Doco dùtù Melquisedec yucán, mate có-nduú-né descendencia xi Leví, doco dècuèndè

nùu stná Abraham nì cutahvì-né diezmu mà, dandu nì dàhî stná-nè nècuàchìmà, mate (iin ana ìì gá nduú nècuàchìmà) ñà-nì saquin Dios iin compromisu xì-né.

⁷ Ñàyùcàndùá, (chicá ìì Melquisedec), vachí ináhá vâha-nda, cuisì iin ana chicá ìì cui dahî xì inga nèhivì.

⁸ Te dùtù xínduu descendencia xi Leví, nèhivì ùún nduú-né, mà cútiácú-nè nicanicuahàn, doco tavá-né diezmu vichi. Doco tucu iá ñà-ndùá cachí (tutu ìì) sàhà Melquisedec, vâchi ducán cáhàn mà sàhà-né (na ian) itiácú ìì-né.

⁹⁻¹⁰ Te mate vichi tavá descendencia xi Leví mà diezmu nùu nèhivì, doco tucu nduá nisa quida-ne antes, vâchi como yohòtéhè Leví nduú Abraham, te nì dòcò-né diezmu nùu Melquisedec mà, ñàyùcàndùá dècuèndè cui quida stná-ndà cuenta na ian stná Leví nì dòcò xì diezmu mà nùu nècuàchìmà na ní quee-ne nì sanchìcùn ìchì-né Abraham.

¹¹ (Ináhá-ndá), nì nìhì nècuàchì raza-ndà ley ìì xí Dios sàhà ndahà dùtù descendencia xi Leví. Te tnaha Aarón nì sanduu stná nsidaa dùtù mà. Doco siempre cumánì gá quee viì chuun nisa quida-ne, ñàyùcàndùá nì ndecunu inga dùtù, (divi nduú mii-yá). Doco có-quidá-yá na ian nisa quida Aarón sàhana; còò. Na ian nisa quida Melquisedec, ducán quidá-ya.

¹² Te ñà-sànì dama (Dios) modo quidá dùtù, ñàyùcàndùá icúmí stná-yà dama-ya ley (nchìcùn nèhivì).

¹³ Vâchi Jesús nduú (dùtù saa) cáhàn-ndà sàhà-xí, te diín descendencia icúmí mii-yá; còò ni-iin yohòtéhè-yá nìsá quidáchúûn nahi dùtù nùu mesa

ìì xí Dios.

¹⁴ Vàchi ináhá-ndá, divi tiàa nani Judá nduú yohòtéhè Stoho-ndà Señor, doco còò ni-iin palabra nì càchí Moisés sàhà nècuàchì yucán ñà-cunduu-ne iin dùtù, ni stná descendencia xi-ne.

¹⁵ Ñàyùcàndùá, nàhà chicá claru (ñà-ndáà nduá cachí xì-nsiá), vàchi vichi sàni ndecunu inga dùtù, te (nicanicuahàn) quidá-yá chuun ìì mà nùù Dios nacua nìsa quida dùtù Melquisedec sàhana.

¹⁶ Vàchi divi sàhà-ñá itiácú-yà nicanicuahàn, te iá cuàhà poder xi-ya, ñàyùcàndùá nì nìhì-yá chuun xi dùtù mà, màdì sàhà-ñá nduú-yá descendencia (xi inga dùtù) nacua cachí iin ley.

¹⁷ Vàchi ducán nì cachi Yua-nda Dios xì Jesús: Nicanicuahàn cucumi-ní chuun xi dùtù nacua nduú chuun nìsa quida Melquisedec.

¹⁸ Ñàyùcàndùá, nì ndañuhu ley sàhana ma, vàchi cóni quèé vííá. Mànicùí chindee cuàhà-ñá nèhivì,

¹⁹ mànicùí nacuaàhandee iniànè ñà-sàà-nè quida vii-né nacua ndiá ìcà-né. Ñàyùcàndùá nì sàha-yàndó inga tnùndé ini chicá ndiaha, te divi sàhàjàn vātùni thātuu-nda nùù-yá vichi.

²⁰ Cunaha-nsiá, na ní sàha Yua-nda Dios Jesús chuun xi dùtù, nì chinaha-yá mii-yá (ñà-nicanicuahàn cunduu-yamà dùtù).

²¹ Doco dùtù (descendencia xi Leví mà), còò, cóni cáhàn-yà ducán na ní sàha-yanè chuun yucán. Cuisì Jesús nduú ana nì nihitáhvi nì cáhàn xì Dios ducán, te dohó nì cachi-yà:

Yùhù nduú Stohò-ní Señor, te chináhî mií, (se-guru cundua), mà dáma inì: nicanicuahàn cucumi-ní chuun xi dùtù nahi chuun nìsa quida Melquisedec.

22 Pues ducán nì cachi-yà xì Jesús, te sàhà-ñá fuerte guá palabra xi-ya, ñàyùcàndùá chicá ndiaá tratu saa (nì saquin-yà).

23 Daaní, dùtù ùún-ní, màdì nicanicuahàn icúmí-nê chuun xi-ne, vàchi xíhì-nè; ñàyùcàndùá, cuàhà-né sàni quida xi chuun xi dùtù mà.

24 Doco Jesús, còó; mà nunca sàà inga nèhivì cunduu-ne dùtù lugar xi-ya, vàchi nicanicuahàn itiácú-yà.

25 Ñàyùcàndùá, nú xícàn tàhvi-ndà nùu Dios, te ndácùcahan-nda quivì Jesús, vàtùni dacácu dahuun-yàndó nicanicuahàn, vàchi nicanicuahàn itiácú-yà cáhàn-yà sàhà-ndà.

26 Cunaha-nsiá, meru dùtù xiñuhu-nda nduú Jesús, vàchi ì ndisa-ya, mà dáná-yá, còò cuáchi-ya, tucu dahuun iá-yà nùu nècuàchì cuàchì, te vichi dècuèndè (gloria) chicá nùu-xí ansivi sàni sàà-yà.

27 Còò necesidad icúmí-yâ dòcò-yá promesa nsiquívì sàhà-ñá nàà sàhà cuàchì nèhivì. Ducán quidá dava ga dùtù, dihna dócò-né promesa sàhà mii-né, dandu después sàhà nècuàchì dava ga. Doco Jesús, còó, iin xichi-ni nì sàha-ya vida xi-ya nì sanduu-ya promesa nì dànàà dahuun-ya sàhà-ndà, te nicanicuahàn ndiaá ñà-jaàn.

28 Daaní, cachí stná ley sànaha ma ñà-vàtùni cunduu nèhivì iin dùtù mate iá cuàchì-ne. Doco vichi, còó, sàni yàha ley mà, te sàni cachi fuerte Dios ñà-divi Dèhemanì-yá cunduu dùtù xi-nda; te nicanicuahàn cundiaa chuun ì quidá mii-yá.

8

Nansa cáhàn Jesús sàhà-ndà nacua cachí ley saa

sàni sàha Dios cunchicùn-ndà

¹ Nsidaa ñà-jaàn sàni cachi sàhà-ñá cundaà inì-nsia ñà-divi mii-yá nduú dùtù xi-nda, vàchi chuun jaàn quidá-yá vichi ndé iá-yà ansivi ladu cuahá silla ndiaha ndé iá Yua-nda Dios.

² Xinúcuáchí-yâ ini vehe ì-yá, vàchi vehe ma nduú veheñùhu ndisa xi-ya, te Stoho-ndà Señor nduú ana nì quidavàha xán, màdì nèhivì.

³ Daaní, nsidaa dùtù (ñuhìví yohó), chuun xi-ne nduá chíndoó-né promesa xi nèhivì nùù Dios, te sahmí stná-nè ñà-nduá dócò-né nùù-yá. Ñàyùcànduá nì xiñuhu cucumi stná Jesús ñà-cui chindòò stná-yà nahi promesa.

⁴ Vàchi nú ni cóó ì-yá ñuhìví yohó nì cuí, dandu mà cúí cunduu-ya dùtù, vàchi sàndòó cuahà dùtù xi ley xi Moisés, te (nsìquívi) chíndoó-né promesa xi nèhivì nùù Dios.

⁵ Doco cunaha-nsiá, seña uun nduú veheñùhu xi nèhivì, xì stná nsidaa ñà-nduá xichúûn-né nùù chuun xi dùtù mà, có-nduá ñà-ndiaha ndisa iá ansivi. Vàchi na cuáhàn Moisés quidavàha-ne veheñùhu sìcoto sàhana, nì cachi Dios xì-né: “Caquìn-ní cuidadu ñà-quidavàha-ní nsidaájàn nacua iá veheñùhu nì dâcùnî mii-ní (na ní nana-ní) yucú yucán”.

⁶ Doco vichi icúmí Jesús iin chuun chicá ndiaha (nùù dùtù ndoó ñuhìví yohó), vàchi ley saa sàni sàha-ya vichi nduú iin ley chicá vaha, vàchi chicá ndiaha nì cachi-yà quida-ya xì-ndà vichi.

⁷ Vàchi ley primeru mà, nú còò ni-iñàha cumánì gá nùá, dandu mà cáquín gà Dios inga ley saa ma nì cuí.

⁸ Doco cónì ndóo ini-yà xì nèhivì (nchícùn ley

primeru mà), ñàyùcàndùá, dohó nì cachi-yà (nùù tutu ìì):

(Yùhù nduí) Stoho-nsià Señor, te cachí, vaxi iin quìvì, dandu icúmí cuàhi iin ley saa cunchicùn nècuàchì ñuu Israel, xì stná nècuàchì ñuu Judea.

⁹ Te ley saa ma, tucu coa nùù ley nì sàhi xii-né quìvì nì taví-nè nùù ñuu Egipto, te nì dàcúndêhí-nè ichì ndé nì caquee-ne; vachi ley mà, cóni chívàha vii-néa. Ñàyùcàndùá nì nacoì-nè.

¹⁰ Còó, tucu coo ley saa icúmí cuàhi nsidanicuú nècuàchì mà quìvì nùù-xí, cachí. Vachi meru ini sàxìnítùnì-nè icúmí chihi ley xi; dècuèndè meru ini anima-nè icúmí stná ndòo dahuan. Dandu mindaa yùhù cunduu ana cahvi-né, te mii-né cunduu ndisa-ne nèhivì xí.

¹¹ Te quìvì yucán, mà cóó gá necesidad chinaha tnahá-né sàhí sàhà-ñá cunaha tnahá-né xì; còó, vachi nsidanicuú-né, icúmí-nè cunaha-né yùhù, nècuàchì ndahví te nècuàchì cuicà.

¹² Te yùhù icúmí cuicahnú stná inì sàhà nsidaa ñà-có-ndiàá nì quida-ne; te mà nunca nsinuu ga inì sàhà cuàchi-ne mà, nì cachi Dios.

¹³ Pues sàhà palabra jaàn (vètùnì cundaà ini-ndà) ley tuhú sàni nanduu ley primeru mà, vachi ley saa nduá cachí-yà (xì inga ley nì sàha-ya). Ñàyùcàndùá, nú ñà-tùhú nduú ley sànaaha ma, dandu sà-ítúú ndañuhu dahuan.

9

Veheñuhu íá ñuhiví yohó xì veheñuhu íá ansivi

¹ Ley primeru mà, nì cachà xì nèhivì nansa xiñuhu cunucuachi dùtù nùù Dios, xì nansa cuyucun stná iin vehe ì ñuhiví yohó.

²⁻³ Ñàyùcàndùá, nì cuyucun iin veheñùhu sìcoto ndiadí nihni xì iin sìcoto caní, dandu nì nandua ùì quartu. Te ini quartu primeru mà íin iin candelero, xì stná iin mesa ndé itádoó pan ì nùù Dios. Daaní, inga ladu mà nduú vehe ndé cachí-nè nduú vehe chicá ì.

⁴ Te icúmí lugar mà mesa oro ndé sahmí-né inciensu, te yucán íá stná caja ì xí ley mà, idáducán iin chididà oro. Te ini caja mà inácaa iin quidi oro ndé ñuhú comida nani maná, te inácaa stná vara xì Aarón nì cana ita. Daaní, ñuhú stná ndúi tabla yùù ndé itándiaa palabra xì ley mà.

⁵ Te dìquì caja ì mà xí-ítasisi ángel ndiaha nani querubín, itaníní ndìxìn-né dìquì-nú, te tìxi ndìxìn-némà nì sanduu lugar ndé nìsa xicahnú ini Dios sàhà cuàchi nèhivì. Doco vichi có-cùsái càhàn cuàhà gué` xì-nsiá sàhà nsidaámà.

⁶ Pues nì nsihi nì cuyucun nsidaa iñàha ini veheñùhu sìcoto mà, dandu nsiquívì nìsa sahàn dùtù ini quartu primeru mà ñà-quida-ne chuun icúmí-nê quida-ne.

⁷ Doco quartu ùì íá chicá inì-xima, còó; cuisì dùtù chicá cusáhnû nduú ana quíhvi inì-xima, doco cutu iin quívì cada cuià quíhvi-ne, nihí-né nì (quisì) sàha-ne sàhà cuàchi mii-né xì sàhà stná cuàchi nèhivì dava ga, divì cuàchi nì quida-ne cónì sàha-ne cuenta.

⁸ Pues sàhà-ñá ducán nì ndacu nuù nèhivì sàhana ma, seña nduá nì cachitnùhu Espíritu Ì ñà-tàyóo permisù yàha nèhivì ndè lugar chicá ì xí-yá na

quívì xichúûn vá-né vehe ìì primeru mà.

9 Pues cunaha-nsiá, iin ejemplu nduú nsi-daa ley xi veheñùhu yucán sàhà-ñá cundaà ini ndohó nècuàchì tiempu vichi. Vàchi cachí ley mà ñà-xiñùhù dòcò-ndà cuàhà iñàha (veheñùhu), te cahmi stná-ndà quisì nduú promesa xi-nda. Doco mate ducan ni cahvi-ndayá, mà cúí dacúxíóámà cuàchi-nda nùù sàxìnítnùní-ndà.

10 Vàchi cuisì cáhàn ley mà sàhà índù comida xiñuhu cuxi-nda, te ò índù ñà-coho-nda, ò nansa icúmí ndoo traste xi-nda, xì nansa icúmí-ndá cuchi-nda; cuisì sàhà ñà-íá ñuhìví yohó-ní cáhàn ley mà. Vàchi nì chitnùní ini Dios ñà-cuisì cundiaàmà nùù-ndà dècuèndè quívì quee inga ley saa xí-yá.

11 Doco vichi sà-íá Cristu, te mii-yá nduú-yá dùtù xi-nda sàhà-ñá cui ñihitáhvi-ndà ñà-ndiaha ìì xí-yá. Te xinúcuáchí-yá ini iin veheñùhu có-íá ñuhìví yohó, vàchi màdì ndahà nèhivì nì cúyúcàn, ñàyùcàndùá chicá ìì-ñá, te chicá ndiaha stná.

12 Te mii-yá, iin xichi-ni nì quìhvi-ya ini lugar chicá ìì yucán, doco màdì nìi chelù, ò nìi litú nduá nihí-yá nì quìhvi. Còó; divi nìi mii-yá nduá nì sàha-ya, te sàhámà vètùni nì ñihì-yá nansa càcu dahuun-nda nicanicuahàn.

13 Vàchi nèhivì (antes), nú sàni quida-ne iin falta nùù ley xi-ne, te có-íá ndoo ga-nè (nacua cachí ley mà), dandu xíhì buey, o xíhì litú, te xíxìn stná iin chelù dìhì, te nandúú-si nahi mii yàà. Dandu sódò nsiquìn dùtù nìi quisì mà, xì stná yàà mà dìquì nèhivì mà, dandu ñà-sàni ndañuhu falta xi-ne cundua. Sàni ndundoo-ne iyuhu, mate cuisì cuerpu xi-ne, (màdì anima-nè).

14 Te nú ducán nìsa (quida nèhivì xì nìi quisi), dandu na cuahà gá más ndiaá nìi Jesús sàhà-ñá ndoo cuàchi anima-ndà, nsidanicuú cuàchi cuàhàn dandáñuhú dahuun xi-nda ni cuí. Vàchi sàhà-ñá itíacú anima-yà nicanicuahàn, ñàyùcànduá nì sàha-ya meru vida xi-ya ña-cundua na iin promesa; te promesa ndiaha ndisa nduá, vachi còò ni-iin cuàchi nì quidá-yá. Pues sàhà nsidaájàn, sàvètùni cunucuachi víi-nda nù mii-yá iá nicanicuahàn.

15 Vachi sàhà ñà-nduá nì quida (Dèhemanì-yá) Jesús, nì sàha-ya inga ley saa xí-yá sàhà ñà-vàha xi-nda. Mate ní quida nèhivì falta ñà-cóni chívàha vii-né ley primeru mà, doco nì xihì Jesús nì dånáà-yá sàhà nsidaa falta mà, te vichi vètùni cundiatú anima nsidaa ana caná-yá; vètùni nihìtáhvi-né ñà-vàha xi-ya dècuèndè nicanicuahàn.

16 Cunaha-nsiá, nú cuní-ndà ndutahvì dèhe-nda biene xi-nda, dandu tiaa-nda iin tutu cachí nansa ndutahvì-né. Doco fuerza cundiatu-ne dècuèndè nú sàni xihì-ndà,

17 vachi mate sàni tiaa-nda tutu mà, mà cundiaá` dècuèndè cachí sàà cui-ndà; có-ndiaá` na itíacú ìi-ndà.

18 Ñàyùcànduá, na ní sàha Dios ley sàhana ma, nì chitnùnì stná ini-yà ñà-cui quisi, te cuitià nìi-sí.

19 Vachi (ducán cachí nùu tutu ìi), nì nsihi nì cachitnùhu Moisés xì nèhivì nsidaa palabra nduú ley mà, dandu nì tnii-ne idi cuahá, xì yùcù nani hisopo, te nì dàndàxín-néà xì nìi chelù xi nìi simbee, te nì dácà stnahá nsidaámà xì tècuí, dandu nì sòdò nsiquìn-nè ndutè mà dìquì libru ìi xí-yá, xì dìquì nsidaa stná nèhivì itá yucán.

20 Te nì cachi-nè: “Sàhà nìi yohó sàni saquin Dios

iin ley ñà-chivàha-nsia vichi”.

²¹ Daaní, davani nì sòdò nsìquìn stná-nè nù mà inicutu ini veheñùhu sìcoto mà xì nù stná nsidaa còhò xichúûn dùtù nù chuun xi-ne.

²² Vàchi cachí ley mà ñà-casi nsidaa iñàha icúmí còdò nù mà icà-xí, te ducán ndundoa nù Dios. Vàchi cunaha-nsiá, mà sàà-yà cuicahnú ini-yà sàhà ni-iin cuàchi-nda nú còò nù nì xítìà.

Nansa nì sàha Jesucristu vida xi-ya sàhà-ñá cuxio cuàchi-nda

²³ Ñàyùcàndùá, na sácuàhàn Moisés dahî-né veheñùhu sàhana ma, vátùni nì xichuún-né nù quisi, vachi veheñùhu ñuhìví yohó-ní nì sandua, te cuisì ejemplu uun nì sanduu stná, cóni sándúá veheñùhu ndisa xi-ya iá ansivi. Doco meru vehe ì-yá iá yucán, promesa chicá ndiaha xiñuhá, màdi cuisì nù quisi.

²⁴ Ñàyùcàndùá, vichi sàni nasaa Jesús ndè meru ansivi ñà-màcuìln-yà nù Dios sàhà-ndà. Màdi veheñùhu ñuhìví yohó nduú lugar ndé nì nasaa-yà, còò; vachi cuisì ejemplu uun nduú veheñùhu ñuhìví yohó, có-ndùú ndisa-ña vehe ì nì quidavàha mii-yá ansivi.

²⁵ Dùtù cusáhnù raza-ndà Judea, na quíhvi-ne ini quartu chicá ì xí veheñùhu, nù (quisi) nihí-né sàhàn, màdi nù mii-né. Te cuìà cuìà quidá-né ducán. Doco Jesús, còò; có-xiñhù cuàha-ya vida xi-ya cuàhà xichi, còò.

²⁶ Vàchi nú ducan ni cùndúá, dandu cuàhà gá xichi icúmí-yâ ndoho-ya dècuèndè na ní sàcòò ñuhìví xì ndè vichi ni cuí. Doco còò, vachi na ní xìnu tiempu antes, dandu nì quixi-ya ñuhìví yohó, te nì sàha-ya vida xi-ya, doco cuisì iin xichi-ni nì

xìhì-yà, vàchi nì dãnáà nsìhí-yá sàhà-ndà, te nì nìhì-yá nansa cuxio dahuun cuàchi-nda.

²⁷ Vàchi divi nacua icúmí nsidaa nèhivì sàà-nè cui-nè iin xichi, te después nsidandaà Dios sàhà-né,

²⁸ divi ducání stná Cristu, iin xichi-ni nì sàha-ya vida xi-ya nì nacuida-ya cuàchi cuàhà gá nèhivì. Dandu después icúmí-yâ naxicocuïn-yà ñuhivì yohó, doco màdì gá sàhà-ñá (ndoho-ya sàhà) cuàchi-nda; còó. Cunaha-nsiá, divi sàhà ñà-càcu nsidaa ndohó nèhivì ndiatú naxicocuïn-yà cund-uamà.

10

¹ Ley sàhana ma, màdì meru ñà-chicá ndiaha ìi xí Dios nì sándúú ndisa; cuisì nì cachitnùhu uan ñà-después icúmí quixi ñà-ndiaha ìi ndisa xi-ya. Ñàyùcàndùá, mate nicanicuahàn dócò ìi-né promesa cachí ley mà, te cuià cuià quidá dùtù ducán, doco mà cúí ndoo cuàchi nèhivì sàhàn nùù (veheñùhu) sàhámà.

² Vàchi nú jaan, dandu mà cuáha ga xì promesa mà, vàchi mà dándóhò gá cuàchi nèhivì sàxìnítnùnì-nè nì cùí.

³ Doco vichi, sàhà-ñá cuià cuià sàha ìi-né promesa (cachí ley) mà, ñàyùcàndùá nsinúú ini-nè íá ìi cuàchi-ne.

⁴ Vàchi sàhà nìi buey, ò nìi sìmbèe, mà nunca cui cuxio cuàchi ni-iin nèhivì.

⁵ Ñàyùcàndùá, na ní quesaa Jesucristu ñuhivì yohó, dohó nì cachi-yà xì Yuamánì-yá:

Mii-ní, màdì promesa nduá cuní gà-ní cuàha nèhivì mii-ní. Màdiá cui quisì coco gà-si nùù-ní

nduá cuní-nî. Còó. Ñàyùcànduá vichi sàni quidayucùn-ní iin iquìcúñú cucumí.

⁶ Vàchi màdì quisì nì xixìn, nì màdì inga clase promesa sàhà cuàchi nduá cudî inì-ní sàhà-xí; còó.

⁷ Dandu yùhù, nì cachì: “Yohó vaxi ñà-quida ndise cumplir ñà-nduá cuní-nî, nacua cachí tutu ì sàhí, Dios míó”.

⁸ Cunaha-nsiá, jaàn nì cachì Dios ñà-có-cudî gá ini-yà sàhà promesa sáhatahvì nèhivì, nì có-cudî gá stná ini-yà sàhà quisì sahmí-né; còó, có-cudî ini-yà sàhà ni-iin ñà-jaàn nì sàha-ne sàhà cuàchi-ne, mate divi nduá cachí ley (primeru-mà) cuàha-ne.

⁹ Daaní, después nì cachì Jesucristu: “Yohó vaxi ñà-quida ndise cumplir ñà-nduá cuní-nî, Dios míó”. Pues ñà-jaàn cuní cachì cuàhàn-yà dandáñúhú-yâ ley primeru mà, te caquin-yà inga ley saa xí-yá.

¹⁰ Te sàhà-ña nì quida ndisa-ya nsidaa ñà-nduá nì ndacu nuù-yá, ñàyùcànduá vátùni nduhii dahuun anima-ndà, vachi nì sàha-ya iquìcúñú-yà nahi promesa ñà-danáa-yá sàhà-ndà. Iin xichi-ni nì quida-ya ducán, doco nicanicuahàn cundiaà.

¹¹ Quivì vichi itá dùtù raza-ndà, quidá-né chuun xi veheñùhu xi-ne; te nsiquívì sàha-ne cuàhà xichi promesa xi ley mà, mate mà nunca dacúxíóá cuàchi-nda.

¹² Doco Jesús, còó, iin xichi-ni nì danáa-yá sàhà cuàchi-nda, te nicanicuahàn cundiaàmà, dandu nì sàcòo-ya ladu cuahá Yuamáni-yá,

¹³ te ndiatú-ní-yá dècuèndè cundee dahuun-yamà nuù nsidaa ana xiní ùhì xì-yá, te cusahnú-yá nuù-né.

14 Vàchi iin xichi-ni nì dānāà-yá (sàhà cuàchi-nda), dandu nicanicuahàn icúmí ndee vaha nsidaa ana sàni ndoo cuàchi anima-xi.

15 Te divi ducán cachí stná Espíritu ìi xí-yá. Vàchi primeru nì cachi Stoho-ndà Señor palabra yohó:

16 Tucu coo ley saa icúmí cuàhi nècuàchì mà quivì nùù-xí, cachí, vàchi meru ini anima-nè icúmí nacoò dahuin ley mà; meru ini sàxìnítnùnì-nè icúmí chihà.

17 Dandu después cachí-yà:

Ndè nicanicuahàn mà nunca nsinuu ga inì sàhà cuàchi-ne.

18 Ñàyùcàndùá, cunaha-nsiá, nú sàni ndutu dahuun cuàchi-nda, còò gá necesidad cuàha-nda ni-iin ga promesa ñà-danāà xì sàhà-ñá.

19 Sàhà ñà-jaàn, có-yûhî gà-ndà datnátuu-nda anima-ndà nùù Dios, mate iá-yà lugar xi-ya ndé chicá ìi, vàchi sàhà nì Jesús sà-nùná ichì, ñàni.

20 Na iin ichì saa nduá, te divi mii-yá nì quidayucun xán, vàchi sàhà-ñá itiácú ndiaha-yá, ñàyùcàndùá iá ichì mà. (Antes iin sìcoto nìsa sadi nihni ndé nduú lugar chicá ìi xí Dios, doco) sìcoto mà, ejemplu sàhà cuerpu xi Jesús nì sandua, (vàchi na ní xihì-yà), divi sàhà ñà-jaàn nì nihì-ndà nansa yàha-nda nùù Dios.

21 Te vichi sà-icúmí-ndá iin dùtù ndiaha chindéé xí nsidaa ndohó ana nduú dèhe ndisa-ya.

22 Ñàyùcàndùá, màsà yûhî-ndà datnátuu-nda anima-ndà nùù-yá. Iin-ni ni cúníhnú ndisa ini-ndà mii-yá; ni cúníndísâ víi-ndayá, màsà cúcáhán-ndá a jaan á coó. Vàchi sàhà-ñá nì xìtià nìi-yá, ñàyùcàndùá sàni ndundoo sàxìnítnùnì-ndà,

te có-dàndòhó gá`ndó; te ducán queámà na ian sàni xichi-nda tècuí limpiu.

Màsà nándodó-nda ichi-yá

²³ Pues sàhà nsidaa ñà-jaàn xiñuhu cunchicùn vii-ndà ñà-nduá xiníndísá-ndá; iin-ni ni cúníhnú vaha ini-ndà ñà-jaàn. Màsà dáma sàxìnítnùní-ndà, vachi sàni sàha-ya palabra xi-ya, te mà dándáhvî-yàndó.

²⁴ Te xiñuhu stná nanducu-nda nansa nacuahandee stnahá ini-ndà sàhà-ñá chicá más ni cúcúú stnahá ini-ndà sàhà-ndà, te quida vii-ndà xì ñanìtnaha-nda.

²⁵ Ni màsà nácóó-ndá ñà-nataca-ndà na ian quidá dava nèhivì. Còó; vichi chicá xiñuhu cunuù stnahà-ndà, te nacuahandee stnahá ini-ndà, vachi sà-ìndéhe-nda chicá sà-cùyátní quivì (naxic-ocuíñ-yà).

²⁶ Vachi cunaha-nsiá, nú sàni cundaà vaha ini-ndà nansa iá ichi ndàcuisi-yá, doco quidá canúú ñi-ndà cuàchi-nda, dandu còò cá ni-iin promesa cui danáà xì sàhà-ndà.

²⁷ Ndé cuisì-ní ndóo ga ñà-yùhí cuaá-ndà, vachi vaxi castigu cahnú, vaxi ñuhu níhi coco nsidaa ana có-ndòó ladu xi-ya.

²⁸ Nèhivì sànaaha, nú nì cahíchì ini-nè ley xi Moisés, dandu fuerza cui-nè nú ndoó ùì ò ùnì testigu cachí nansa nì cuu, te nú ducán, dandu còò iin ni cuhí ini xì-né na ní xhì-nè.

²⁹ Doco nú meru Dèhemanì Dios nduú ana cahíchì ini iin nèhivì, dandu ¿nansa tuxí inì-nsia cuu? ¿Amádi cuàhà gá más castigu icúmí-nè nihì-né? Vachi nú có-quidáñúhú-nê ñà-nì xìtià nì ndiaha-yá, dandu cahnú sàstnùhù coo castigu

xi-ne, vâchi sâhà nîi mà nî ndoo anima-nè, te sâhà stnâ mà nî saquin Dios iin tratu xî-né. Daaní, stnâ Espíritu Ìi xí Dios, gracia nî quida stnâ-yà xî nècuàchìmà, doco nú vîchi cutu ni cahíchi ini-nè nsidaámà, dandu ndahví-nè.

³⁰ Ináhá-ndá ñà-divi Dios nduú ana nî cachi xî-ndà dohó: “Míi quidá tocar nachitacùhá sâhà falta xi nèhivì; còò cá ana icúmí nacuàha xi-né castigu”. Te cachí stnâ (tutu ìi) ñà-divi mii-yá icúmí-yâ nsidandaà-yà sâhà cuàchi nèhivì xí-yá.

³¹ Cunaha-nsiá, tnùndoho cahnú cundua nú ni níhì nèhivì castigu nùù ndahà Dios iá nicanicuahàn.

³²⁻³³ Doco mii-nsiá, xiñuhu nsinuu ini-nsià nansa nî cuu xi-nsiá quivì primeru na lácà nî dàtnùù-yà sàxìnítùnì-nsiá, cuàhà tnùndoho nî yàha-nsia. Dava xichi nî canàhá nèhivì xî-nsiá, te dava xichi nî dándòhó stnâ-nè mii-nsiá nùù tàcá nèhivì. Te dava xichi cuisì-ní nî quida-nsia acompañar nècuàchì nî ndoho ducán, doco calma nî quidandee inì-nsia sâhà nsidaámà.

³⁴ Te na ní sàcùndiadi stnâ compañeru-nsià, dandu nî indehè ndahví-nsiànè; te na ní candiaa nèhivì biene xi-nsia, (cónì cùhúún inì-nsia), còó, duha nî cudì inì-nsia, vâchi ináhá-nsiá, ndè gloria xi Dios chicá cuàhà iñàha icúmí-ndá, te chicá ndiaá mà, vâchi nicanicuahàn cunaha-ñá.

³⁵ Ñàyùcàndüá, iin-ni ni cúníhnú vâha ini-ndà (ichì-yá), màsà nácóó-ndáñâ, vâchi iin ñà-vâha cahnú icúmí-ndá nìhì-ndà nùù-yá.

³⁶ Iin-ni ni cúnchícùn cuéyàà-ndà ichì mà, vâchi nú sàni nsihì nî quida-nda nsidaa ñà-ndüá cuní Dios quida-nda, dandu nìhì-ndà ñà-ndiaha ìi sàni cachi sahnú-yá xî-ndà.

³⁷ Vàchi dohó cachí tutu ìì:
Cunaha-nsiá, icúmí-yâ naxicocuîñ-yà: làcà sacu
tiempu cumánì gá; mà cuéé gà-yà.

³⁸ Te (cachí stná-yà): “Nèhivì vâha xi, nú xiníndísâ
vâha-ne yùhù, dandu ñihì-né vida ndiaha. Doco
nú ni ndédúmá ini-nè, dandu ni-iyuhu mà ndóo inì
sàhà-né”, cachí-yà.

³⁹ Doco ndohó, có-ndùù-ndà nèhivì ndedúmá
ini-xi, vâchi nú jaan, ndañuhu anima-ndà. Còó,
nèhivì xiníndísâ nduu-nda, ñâyùcànduá icúmí-ndá
càcu-nda nùù-yá.

11

Xiñuhu cunindísá ví-nda

¹ Nú ndisa xiníndísâ vâha-nda Dios, dandu cuní
cachàmà ñà-nìhnú cuisì ini-ndà icúmí cuu ndisa
ñà-nduá ndiatu-nda. Te nú xiníndísá-ndá ducán,
dandu quidá stná-ndà cuenta na ian sà-íá ndisa
ñà-tañáha ga cuninùù-ndà.

² Te divi ñà-jaàn nduú stná ñà-nduá nìsa quida
xìi-ndà sàna, nì xinindísá-né mii-yá, te nì ndee
vâha-ne nùù-yá.

³ Ndohó, xiníndísá-ndáyâ, te sàhájàn vátùni cun-
daà ini-ndà nansa nì quidavâha-ya ñuhiví, cuisì nì
càhàn-yà, te nì sàcò; ñâyùcànduá, indéhe-nda iá
ñuhiví vichi, doco màdì ñà-tuì cundehè-ndà nduá
nì cuyucàn; còó.

⁴ Daaní, Abel, na ní sàha-ne Dios promesa xi-ne,
chicá nì sandiaàmà nùù promesa nì sàha Caín.
Te ¿índù chuun chicá ndiaámà? Divi sàhà-ñá
nì xinindísá nècuàchìmà mii-yá. Ñâyùcànduá, nì
cachi-yà: “Sàni ndee vâha Abel nùù; cudíi inì
sàhà promesa xi-ne”. Ñâyùcànduá, mate còò cá

Abel mà, doco dècuèndè vichi iá ì fama-nè ñà-nì xinindisá-néyà.

⁵ Daaní, Enoc tu, nì xinindisá stná-nè mii-yá, te vivu nì sàà-nè nùù-yá, cónì xihì-nè, nì ndañuhu uun-ne (nùù nèhivì), vàchi sàhà poder ndiaha xí Dios nì ndiachi-né dècuèndè ndé iá-yà. Te cachí tutu ì, ducán nì cuu xi-né ñà-nì cudì guá ini-yà sàhà-né.

⁶ Doco nú có-xiníndisá-ndá, dandu mà nunca cudì ini-yà sàhà-ndà. Vàchi nú cuní-ndà sàà-ndà nùù-yá, dandu fuerza cunindisa-nda iá ndisa-ya, te seguru datnúù-yà sàxìnítùnì nsidaa ana nandúcu ndisa-xi-yá.

⁷ Daaní, stná Noé, nì xinindisá stná-nè mii-yá na ní cachitnúhu-ya xì-né ñà-ndùá icúmí cuu quivì nùù-xí; ñàyùcàndùá, nì quida-ne ñà-ndùá nì cachi-yà, nì quidavàha-ne iin barcu cahnú sàhà-ñá càcu-ne, mii-né xì stná nèhivì vehe-ne. Ducán nì quida-ne, te ñà-jaàn claru nì tui ñà-cónì quidá víi dava ga nèhivì ñuhiví. Doco mii-né, nì ndee vaha-ne nùù-yá ñà-nì xinindisá-néyà.

⁸ Daaní, stná Abraham; nì xinindisá stná-nèyà, te ñàyùcàndùá nì quee-ne cuàhàn-nè na ní cana-yanè ñà-cùhùn xicà-né inga ñuu ndé icúmí-né sàà-nè cunduu-ne stoho nsidaa ñà-íá yucán. Ñàyùcàndùá, nì inini-ne ñà-ndùá nì ndacu nuù-né, mate có-cùndàà ini-nè índù cùhùn-nè.

⁹ (Dandu nì sàà-nè) ñuu ndé nì cachi Dios xì-né mà. Yohó te yucán nì ìa chii-né ñuu mà, nihnú ini-nè nduú-né nècuàchì inga ñuu, doco siempre iin-nì xiníndisá víi-néyà. Cuisi vehe sìcoto nì sanduu vehe-ne, te divi clase vehe yucán nìsa xichuún stná (dèhe-ne) Isaac, xì stná (dèheñani-né) Jacob.

Cunaha-nsiá, stná nècuàchì yucán, iin-ni nì sandiatu stná-nè cuu xi-né ñà-nduá nì cachi Dios xì Abraham antes.

¹⁰ Vàchi nècuàchìmà, (na ní quee-ne ñuu-nè), nandú-cú-nê iin ñuu sàni quidavàha-ya; vachi ni-hnú ini-nè iá iin ñuu nì chít-nù-ní ini mii-yá coo, te fuerte ndisa cimientu xan.

¹¹ Daaní, stná (ñahà-dìhí-nè) Sara, nì xinindisá stná-nè mii-yá. Mate sáyâha ga sahnú-né, doco nì nihítâhvi-né valor ñà-coo iin mée xi-ne, vachi antes sàni cachi sahnú Dios xì-né, te ñàyùcànduá nì tùinuù iin dèhe-ne, vachi xiníndisâ-né mà nunca dandahví-yànè.

¹² Ñàyùcànduá, mate sàsàhnú cuàha Abraham, doco nì ìa iin dèhe-ne, te sàhà imindaa dèhe-nemà nì sàà-nè nì sàcùnduu-ne yohòtéhè cuàhà gá mil nèhivì; cuàhà sàstnùhù nèhivì nì nanduu-ne nahi cuàhà sít-nùù ansivì, ò ñusi ndiquin yuhù mar, vachi mà cùì nandiahvia.

¹³ Cunaha-nsiá, nsidaa nècuàchì sàni nacani xì-nsiá sàhà-ximà, iin-ni nì xinindisá víi-né mii-yá dècuèndè nì xihì-nè. Te mate cóni sàà-nè cun-inùù-né cuu ndisa ñà-nduá nì cachi Dios xì-né, doco iin-ni nì xinindisá-né, mate tàyóa, te nì cudii ini-nè sàhà-ñá, vachi (nì cundaà ini-nè) màdì ñuu ndisa-ne nduú ñuu-nè ñuhivì yohó, ñàyùcànduá nì cachi-nè xì nèhivì ñà-cuisì-ní yáha uun-ne ñuhivì yohó.

¹⁴ Te nú ducán cachí nèhivì, dandu náhà claru inga ñuu nduá nandú-cú-nê, iin ñuu ndé cunduu ñuu ndisa-ne.

¹⁵ Te nú cuàhàn-nè nsinuu ini-nè ñuu-nè primeru nì cùì, dandu vihini naxicocuïn-nè yucán.

16 Doco còó, cóni núhù-nè, vàchi nì cuni-nè cundoo-ne iin ñuu chicá ndiaha, divi ñuu mii-yá iá ansivi. Te sàhà-ñá (nì xinindisá-né ducán), ñàyùcàndùá có-ndùcáhán-yá cachí-yà ñà-ndùú-yá ana cahvi-né, vàchi sàni quidayucun-yà iin ñuu (ndiaha) ndé cundoo-ne (xì-yá).

17 Daaní, después, nì cachi Dios xì Abraham ñà-nì cuáha-ne dèhe-ne Isaac cunduu-tè iin promesa. Ducán nì quida-ya sàhà-ñá cundaà ini-yà a cunini vii-néyá, á coó. Te (nì quida-ne cumplir), nì xinindisá-né mii-yá, dispuestu nì ìa-ne ñà-cunduu dèhe-ne promesa, mate mindaa-té nùù-né, te mate antes sàni cachi sahnú Dios xì-né

18 ñà-divi nùù tèchii Isaac mà icúmí quee cuàhà descendencia xi-ne.

19 Doco nì cundee ini-nè ñà-vàtùni danátíacú-yàte nú ni cuí-te. (Te ñà-nì càcu-tè) nì ndòo-tè vivu nùù-né, ñàyùcàndùá vátùni quida-nda cuenta na ian ndisa, sàni natiacù-te.

20 Daaní, después (nì cundaà ndisa inì-xi) ñà-xiníndisâ stná Isaac mà mii-yá, vàchi cuàhà gá ñà-ndiaha î nì cachitnùhu-ne xì (ùì dèhe-ne) Jacob xì Esaú sàhà nansa icúmí cuu xi-né quìvì nùù-xí.

21 Daaní, Jacob mà, nì xinindisá stná-nè mii-yá, (ináhá-ndá), vàchi na sá-ítúú cuàhàn-nè cui-nè, dandu nì càhàn-nè xì iin iin dèhe José, nì cachitnùhu-ne xì dèheñani-né mà ñà-ìcúmí-tè nìhì-té cuàhà ñà-vàha ndiaha nùù Dios. Ducán nì cachi-nè, naquímànì-né Dios, te itúú-né nùù bastón xi-ne.

22 Daaní, José mà, nì xinindisá stná-nè mii-yá, (ináhá-ndá), vàchi na sá-ítúú cuàhàn-nè cui

stná-nè, nì cachi-nè ñà-seguru icúmí caquee libre nsidaa nècuàchì raza-nè Israel nùu ñuu Egipto. Te nì nacoò stná-nè órden nansa quida nèhivì xì iquìcúñú-nè nú sàni xihì-nè.

²³ Daaní, stná yuadíhí Moisés, nì xinindisá stná-nè mii-yá na ní tùinuù dèhe-ne mà. Te nì caxini-nè cuahani iá-vè, ñàyùcàndùá mate sàni dándacú rey cui-vè, doco cóni yúhì-nè; ùni yòò nì ìa dèhé-vè nì quida-ne.

²⁴ Daaní, stná Moisés mà, nì xinindisá stná-nè mii-yá, te sàhámà na sàni sahnu-ne, cóni cùnì-nè cachi gà nèhivì ñà-dihi-né nduú dèheyoco rey.

²⁵ Còó, chicá nì cudiì ini-nè cùhùn-nè cutnahá-né xì nèhivì xí Dios, mate cuáhà gá nì ndòhó-né, te màdiá ndòo-ne (ndé iá-nè), te quida-ne ñà-vico sìquini iá ñuhivì yohó, vèchi cuisì sacù-ni tiempu coo ñà-vico ma.

²⁶ Chicá nsiha ichì Cristu nì cunchícùn-nè nihnú ini-nè, mate nì cáhìchì ini nèhivì-né; te cóni xího stná-nè ñà-cuicà ñuu Egipto yucán, vèchi iin-ni nihnú ini-nè ñà-cuisì nùu Dios icúmí-nè nihítáhvi-né cuáhà ñà-ndiaha ìi.

²⁷ Daaní, na ní quee-ne ñuu Egipto mà cuàhàn-nè, divi sàhà-ñá xiníndisâ-né mii-yá nì sandua. Nì cóni yúhì-nè ñà-nì xidà guá ini rey dandacú yucán, vèchi iin-ni nchícùn viì-néyà na ian xinínùu-néyà, mate có-tùí-yá indéhe-nda.

²⁸ Daaní, ñà-sàni xinindisá-né mii-yá nduú stná na ní quida-ne vicò pascua primeru, mii-né xì nèhivì raza-nè, te nì dàcáa-ne nùì (lelù ìcà yehè-né) sàhá màsà cúí dèhe sahnú-né quida ángel yàha yucán.

²⁹ Daaní, na ní yàha-ne Mar Cuahá, te nì nduhìchí cahà mar mà nahi ñuhù íchî, divi sàhà-ñá nì xinindisá-né Dios nì sanduu stná` mà. Doco tè-ñuu Egipto, na ní cuni stná-te yàha-tè yucán, dandu nì cahà nsihi-tè.

³⁰ Daaní, sàhà-ñá nì xinindisá stná nèhivì raza-ndà mii-yá, ñàyùcàndùá nì nacununduu-nè ñuu Jericó usà quivì, te nì caà nama ndiadí nùù ñuu mà.

³¹ Daaní, stná nècuàchì ñahà nani Rahab, mate cuahà tiàa nì xicanuu xi-né (antes), doco nì sàa-nè nì xinindisá stná-nè mii-yá, vàchi na ní techuún Moisés iin ùì tiàa ñà-nacunì-te nañsa iá ñuu nècuàchìmà, dandu nì chindee-néte. Ñàyùcàndùá, cóni xíhì-nè nahi nèhivì dava ga có-xiníndisá.

³² Pues vichi có-xiñùhù cachi guè (sàhà nèhivì sàhana ma), ni mà sàa stnáì nacani nsihi xì-nsiá sàhà nsidaa-né, divi sàhà Gedeón, xì sàhà Barac, xì Sansón, xì Jefté, xì David, xì Samuel, xì sàhà stná dava ga nècuàchì nìsa cahàn cuenta xi Dios.

³³ Cunaha-nsiá, divi sàhà-ñá nì xinindisá nsidaa nècuàchìmà mii-yá, (ñàyùcàndùá nì quida-ne cuahà obra ndiaha). Dava-ne nì cundee-né nùù nsidaa nèhivì ndoó inga ñuu. Dandu nì cusahnú víi-né, te nì nìhì-né ñà-vàha nì cachi sahnú Dios xì-né. Te dava-ne nì càcu-ne nùù nsicaha, cóni sàxí-siné.

³⁴ Te dava stná-nè, nì cundee-né nùù ñuhu xíxìn, cóni quidá dañúà xi-né. Te dava-ne nì càcu-ne nùù nèhivì cuahàn cahnì xì-né xì espada nì cúì. Stná nècuàchì còò fuerza xi, nì xinindisá stná-nè mii-yá, te nì ndufuerté-nè, vátùni nì nacuahandee ini-nè, te na ní caquixi soldadu inga ñuu, vátùni nì chindee-né mii-né, te nì taxi-né nsidaa tèmà.

³⁵ Stnà nècuàchì ñahà, nì xinindisá stnà-nèyà, te ñàyùcàndùá nì nìhìtáhvì dava-ne nì natiacu iin nèhivì vehe-ne. Doco dava stnà nècuàchìma, nì dándòhó nèhivì-né, te nì xìhì-nè; vihini dacácu-tèné nì cuì (nú nì nácóó-né ichì-yá); doco còó, cóni quidá-né ducán, vèchi cuní-nè nìhìtáhvì-né iin ñà-vàha chicá ndiaha, divi ñà-natiacu-nè.

³⁶ Daaní, dava stnà nècuàchì sàhaha ma, cuàhà gá nì sàcùndiaa nèhivì-né, te nì ñàhni cuì stnà-nè. Te dava stnà-nè, nì sàcùnuhni stnà-nè cadena, te nì sàcùndiadi-nè.

³⁷ Te dava stnà-nè, nì sahnì nèhivì-né xì yùù, ò machete. Te dava-ne, serruchu nì quedava-ne. Cuàhà gá nì candoho-ne nì quida nèhivì. Ñàyùcàndùá, yohó te yucán nì xìcanuu ndahví-nè, nìsa idàhvi-ne xì cuisì iin riì ò simbee, vèchi ndahví dahuun-ne, cuàhà tnùndoho nì xini-nè; quini nì dándòhó nèhivì-né.

³⁸ Nì xìcanuu ndahví-nè yucù daná, ò inga xaan ndé còò nèhivì, te yucán nì caquidi-nè ini cueva, ò ini iin chìcòhò cahnú. Ducán nì cuu xi-né mate chicá ndiaá-nè nùù nsidaa gá nèhivì ñuhivì.

³⁹ Doco nsidaa nècuàchì sàhaha ma, mate ní nìhì-né nì ndee vèha-ne nùù Dios ñà-nì xinindisá-nèyà, doco cóni nìhìtáhvì-né ñà-ndiaha ñi nì cachi-yà (xì xii-ndà) antes.

⁴⁰ Còó, vèchi sàhà-ñá nihnú stnà ini-yà ndohó, ñàyùcàndùá nì chitnùní ini-yà ñà-dècuèndè quivì vichi coo iin ñà-chicá ndiaha nìhìtáhvì-ndà, dandu iin-nì nacuatnaha-nda xi nècuàchì yucán cundiatú anima nsidaa-nda.

12

Cuisì Jesús ni cúndéhe-nda nùù-xí

¹ Vichi cuàhà sàstrùhù nèhivì (sànaha) sàni nacani xi-nda ñà-ndiaha guá iá (nú xiníndísá-ndá mii-yá). Ñàyùcàndùá, xiñuhu nacoo dahuun-nda nsidaa iñàha sadí xì nùù-ndà. Nì nácóó-ndá nsidanicuú cuàchi quida-nda, vàchi ñà-yúcán nduá dacá xi dìni-ndà. Iin-ni ni cúnchícùn vii-ndà mii-yá inii vida xi-nda; nacua quidá nècuàchi dadavá stnahá xinú carrera, ducán xiñuhu nacuaàhandee ini-ndà.

² Iin-ni ni cúndéhe-nda nùù Jesús, vàchi sàhà mii-yá nì quesaha-nda xiníndísá-ndá ichì-yá, te divi-ya icúmí chindee stná xì-ndà ndè cachi xìnu vida xi-nda. Te mate nchìca cruz nì ndoho-ya, doco cóni ndúlócô-yà na ní cahíchì ini nèhivì-yá ñà-nì xihì-yà ducán, vàchi ináhá-yâ, después icúmí-yâ sàà-yà coo-ya contentu. Daaní, (mànuhù-yá gloria), te yucán nì sàcòo-ya ladu cuahá Yua-nda Dios.

³ Pues vichi xiñuhu nsinuu inì-nsia nansa nì cuu xi-yá, cuàhà gá nì quida quini nèhivì cuáchi xi-yá, doco nì quidandee ini-yà. Ñàyùcàndùá, nsinuu inì-nsia ñà-jaàn, còtó cucahan-nsiá mà cúndéé gâ inì-nsia, te cuhuun inì-nsia.

⁴ Vàchi ñà-ndáà nduá, cuàhà lucha fuerte sàni quida-nsia ñà-màsà cúndéé nèhivì cuáchi ma nùù-nsiá, doco ni-iin-nsia tàñáha ga cahni-né.

⁵ Doco nacua indéhí sàni nandòdó-nsiá nansa cachí Dios nùù tutu ì ndé cáhàn-yà xì-ndà na iin yua-nda. Pues dohó cachí-yà:

Hijos míos, màsà cúñáñá-nsiâ nú nání-nsia nùù yùhù ana nduú Stoho-nsià Señor; còó, ni màsà cúhúún stná inì-nsia nú sàni sàhi-nsià iin conseju tii.

⁶ Vàchi Stoho-nsià nduí, te cuú inì sàhà nsidaa-nsiá,

ñàyùcànduá fuerza nàni-nsia, vèchi nsidaa ana sàni nacàxin ñà-cunduu-ne dèhi, icúmí-né ñàhni stná-nè, cachí Dios.

⁷ Ñàyùcànduá, xiñuhu quidandee ini-ndà na nàni-nda nù-yá, vèchi sàhà-ñá nduú ndisa-nda dèhe-ya nduájàn. Sà-ìnáhá-ndá, na cuati-nda, nsidanicuu-nda nì nhì-ndà conseju nù yua-nda.

⁸ Doco quivì vichi, nú còò ni-iin conseju níhì-ndà nù mii-yá, dandu cuní cachàmà ñà-có-nduú ndisa-nda dèhe-ya, vèchi nsidaa ana nduú dèhe ndisa-ya, ducán quidá-yá xì-né.

⁹ Vèchi yua-nda ñuhiví yohó, nìsa danáni stná-nèndó, te nìsa cahvi-ndané. ¿Amadí chicá ndiá ìcà-ndà cundoo stná-ndà sujetu nù Yua-nda iá ansivi, te ducán nhì-ndà cutiacu ndiaha-nda?

¹⁰ Vèchi sacu tiempu nì ndòo-nda nù yua-nda ndoó ñuhiví yohó, te nacua cudî ini-nè, ducán nìsa danáni-nèndó. Doco mii-yá, cuisì sàhà ñà-cunduu ñà-vàha xi-nda nduá danáni-yàndó, te ducán cunduu ndisa-nda nèhivì ì nahi mii-yá.

¹¹ Pues ñà-ndáà nduá, có-cudî ini-ndà na hora níhì-ndà conseju; tnùndoho nduá cahan-nda; doco nú sàni yàha, te sàni sàà-ndà nì cundaà vaha ini-ndà, dandu chicá ndiaha coo vida xi-nda, vèchi chicá vî sàni sàà-ndà nacani ini-ndà.

Cuàhà gá peligru ndácàn nú cahíchi ini-ndà palabra cachí Yua-nda Dios

¹² Ñàyùcànduá, màsà cúndóó-nsiá cuhúún gá inì-nsia na ian nì còyo ndahàsàhà-nsiá; còó. Iin-ni nì nácuàhandee ini-nsià cunià,

¹³ micuísì ichì vaha-ya nanducu-nsiá sàhà-ñá màsà túcù iin nècuàhì tàcútùha vî cacanuu nacua ndiá ìcà-né. Te nú sà-íá iin ana tàcúndáà vaha inì-xi

ducán, dandu nanducu-nsiá nansa ndufuerté anima-nè.

¹⁴ Ni cúndóó mánì-nsiá xì nsidaa ñanìtnaha-nsia, te ni cuáhandee stná inì-nsia cunihnu ì inì-nsia nicanicuahàn, vèchi nú có-nìhnú ì ini-ndà, mà nunca sàà-ndà cuni-ndà nù Stoho-ndà Señor.

¹⁵ Te cuidadu ni cúndóó stná-nsiá còtó nandòó-nsiá gracia xi-ya, te sàà-nsiá nanduu-nsia nèhivì malu ndedúma inì-xi, vèchi nacua quidá iin yohò yucù daná, ducán cui quida stná nècuàchì malu, mate imindaa-né, doco vihini cunduu-ne dañu xi cuàhà gá nèhivì.

¹⁶ Ñàyùcàndùá, cuidadu cundoo-nsia, còtó coo iin-nsia cùtóó xì ñahà, te ò iin ana có-ndùlócò-xì ichì ì-yá na ian nì quida Esaú sàhana. Dèhe sahnú nì sanduu-ne, ñàyùcàndùá, icúmí-nê ndutahví-né cuàhà ñà-ndiaha ni cuí, doco nì dama-ne derechu mà sàhà cuisì iyuhu ñà-ndùá nì xixi-ne.

¹⁷ Te ináhá-nsiá nansa nì cuu xi-né después, cóni níhi-né ndutahví gá-nè ñà-ndiaha ma nù yua-né, mate yáha ga nì cuni-nè níhi-né. Nì sacundahví-nè (nù nècuàchì mà), te nì sacu fuerte-nè, doco mànicuí gá, vèchi cóni níhi-né nansa nadama-ne ñà-ndùá sàni quida-ne mà.

Tucu iá ñà-ndùá nì xini nèhivì sàhana na ní sàha Dios-nè ley primeru

¹⁸ Vèchi ndohó, cóni tnátuu-nda nù iin yucù (ñuhivì yohó nacua nì quida nècuàchì Israel sàhana), vèchi yucù (Sinaí yucán), xixàn, te iin tnúú ndúchí, có-tùínú, te caná fuerte tàchì.

¹⁹ Te nì sivi stná corneta; dandu nì tiacu cáhàn fuerte mii-yá. Doco nèhivì mà, nì sacundahví-nè nù-yá ñà-màsà cáhàn gà-yà xì-né ducán.

²⁰ Vàchi màni cúndéé gâ ini-nè quida-ne cumplir palabra nì cachi-yà. Te dohó nì cachi stná-yà: “Màsà náná-nsiá icà yucù jaàn, te ni quisì xí-nsiá, vàchi nú ducán, dandu icúmí-nsiâ cahni-nsiási xi yúù, ò xì lanza”.

²¹ Cunaha-nsiá, yáha ga nì cayùhí cuaá nèhivì mà na ní indehè-né nansa nì cuu. Dècuèndè stná Moisés nì cachi-nè: “Ndé quidí cuísì ñà-yùhî güè”.

²² Doco ndohó, còó, vàchi ichì yucù nani Sión sàni quihìn-nda vichi, vàchi yucù yucán nduú ñuu mii-yá iá nicanicuahàn. Te Jerusalén Nsiaha Iá An-sivi, ducán nani stná ñuu mà. Te sàni sàà stná-ndà ndé ndoó tàcá cuàhà mìl ángel xi-ya,

²³ ndeníhí vàha-neyà. Te sàni nacuatnahá stná-ndà xì nsidaa gá nèhivì xínduu dèhe-ya, divi nsidaa ana itándiaa quivì-xí ndè gloria xi-ya. Te sàni dàtnátuu stná-ndà anima-ndà nùù mii-yá ana icúmí nsidandaà sàhà nsidaa nèhivì, divi nduú Díos; te vichì iin-ni sànduú stná-ndà xì nèhivì nì ndee vàha nùù-yá sànahà, doco vichì sàni nihì stná-nè nì cundiatú ndiaha stná anima-nè.

²⁴ Vàchi nùù Jesús sàni tnàtuu anima nsidaa-nda, vàchi divi mii-yá nduú ana cáhàn nihni sàhà-ndà, te nì saquin stná-yà iin tratu saa xi-nda, divi nduú ñà-nì xìtià nì-yá (sàhà-ndà); te cunaha-nsiá, chicá ndiaha quidá nì-yá mà nùù nì Abel sànahà.

²⁵ Ñàyùcànduá, cuidadu ni cúndóó-nsiá ñà-màsà nácuáa-nsiá mii-yá ana cáhàn xì-ndà vichi. Vàchi nú cóni cácu nèhivì sànahà na ní cahíchì ini-nèyà na ní cáhàn-yà xì-né ñuhiví yohó, dandu chicá mà cácu ndohó nú cahíchì ini-ndà palabra cachí-yà xì-ndà dècuèndè ansivi.

²⁶ Na ní cáhàn-yà antes, fuerte nì tnàa ñuhiví;

doco vichi sàni cachitnùhu-ya xì-ndà inga palabra yohó, cachí-ya: “Inga xichi icúmí datnái ñuhiví. Doco màdi cuisì ñuhiví yohó icúmí tnàa; còó, dècuèndè stná ansivi icúmí tnàa”.

²⁷ Te na ní cachi-yà palabra mà ñà-inga xichi icúmí tnàa, pues cuní cachàmà ñà-ìcúmí cuxio nsihi nsidaa ñà-ndùá nì quidavàha-ya ñuhiví yohó. Doco nsidaa ñà-cuàhàn cunaha nicanicuahàn, icúmíâ ndòa.

²⁸ Vàchi ñuhiví ìì ndé icúmí-ndá cundoo-nda, mà nunca ndutá. Ñàyùcàndùá, iin-ni xiñuhu naquimanì-ndàyá sàhámà sàhà-ñá vâtùni cunucuachi víi-nda nùù-yá nacua cuní-yà quida-nda, te cahvi víi-ndayá; màsà nácuìdiqui uun-nda ichì-yá,

²⁹ vàchi nahi ñuhu níhi nduú-yá, te mà úhì cahmi nsihi-ya (ana cahìchì ini).

13

Nansa quida-nda, te cudìi ini Dios sàhà-ndà

¹ Iin-ni ni cuú stnahá ini-ndà sàhà-ndà na ian iin-ni ñaní xínduu-nda.

² Màsà nándodó-nda coo manì ini-ndà xì nèhivì cóyo vehe-nda, vàchi dava nèhivì, ndè stná ángel xi Dios nì dàyáha-ne vehe-ne, te cóni cúndàa ini-nè.

³ Te xiñuhu nsinuu stná ini-ndà compañeru-ndà xíndiadi vehecàa; te ducán quida-nda cuenta na ian cutnàhâ stná-ndà xì-né ndiadí-ndà. Te nú quidá quini nèhivì xì dava ga compañeru-ndà, dandu cundehè ndahví stná-ndà nècuàchìmà, vàchi na nèhivì nduú stná-ndà, te vihini cuu stná xì-ndà ducán iin quivì.

4 Daaní, xiñuhu quida tnũñuhu stná-ndà xì nècuàchì vehe-nda. Màsà quídá-ndá ni-iin falta xì inga nèhivì. Vàchi iin castigu fuerte cuàha Dios ana nchícùn xì ñahà, te ò ana cáhàn xì nècuàchì có-ndùú nècuàchì vehe-xi.

5 Màsà xího-nda cucumi-nda ñà-cuicà ñuhivì yohó. Nacua sà-ìcúmí-ndá, xì ñà-jaàn-ní ni cúndóo-ndá contentu, vachi sàni cachi-yà: “Yùhù, mà nunca nandòdí mii-nsiá. Mà nunca nacoo nihni mii-nsiá”.

6 Ñàyùcàndùá, vátùni cáhàn ndee-nda, cachí-ndà:

Divi Stoho-ndà Señor nduú ana chindéé xì. Mà yúhî, vachi còò ni-ìñàha cui quida nèhivì xì’.

7 Daaní, xiñuhu nsinuu stná inì-nsia nècuàchì nìsa idònuù nuù-nsiá antes, divi nècuàchì nìsa dacuaha-xi-nsiá palabra ìì xì Dios. Xiñuhu nsinuu ini-nsià nansa nìsa quida viì-né vida xi-ne, te iin-ni ni cúníndísà stná-nsià nahi mii-né.

8 Cunaha-nsiá, iin-ni iá Jesucristu, dècuèndè sànhà xi vichi, te nicanicuahàn.

9 Màsà cuàha-nsia chiyuhù nèhivì-nsiá ñà-cunchicùn-nsià inga ichì có-ìnhá-nsiá, vachi cuàhà ichì tùcù iá chináhà-nè; cuàhà gá ichì tàcùnì-ndà iá. Doco ndohó, chicá vaha cuisì gracia xi mii-yá ni cúníhnú ini-ndà, te ndufuerté anima-ndà, màdíá cunchicùn-ndà iin ley cachí sàhà cuisì índù comida cui cuxi-nda, vachi nèhivì nacání guâ inì-xi sàhámà, còò ni-iin ñà-vàha xi anima-nè tavá-né.

10 Dùtù xinúcuáchí veheñuhu (xi raza-ndà, itiácú-nè ñà-ndùú promesa xi nèhivì). Doco ndohó, iá stná promesa xi-nda, (divi nduú Jesús);

doco nècuàchì veheñùhu ma, còo derechu xi-ne nihitàhvi-né ni-iñàha nùù mii-yá.

11 Vàchi quisì nduú promesa sáha-ne veheñùhu ma, xitià nìi-sí, dandu nihí dùtù-ñà sáhàn ndé nduú lugar chicá ìi, te quidá-néamà presentar sàhà cuàchi nèhivì. Doco íquicúñú quisì mà, còó; ndè fuera ñuu icúmíâ coca.

12 Pues divi ducán nì cuu stná xì Jesús sàhà-ñá nihì nèhivì ndoo ndisa cuàchi-ne sàhà nìi-yá. Vàchi fuera ñuu nì ndoho stná-yà.

13 Ñàyücàndùá ndohó, iin-ni ni cúnchícùn stná-ndàyá, mate icúmí-ndá nacoo-nda ñuu-ndà, te cahíchì ini nèhivì-ndó nacua nì quida-ne xì mii-yá.

14 Vàchi ni-iin ñuu iá ñuhiví yohó, mà cúndúá ñuu-ndà nicanicuahàn. Còó, iin ñuu quesaa quivì vaxi xi-nda nduá ndiatu-nda.

15 Ñàyücàndùá, nicanicuahàn ndiá ìcà-ndà ndenihì vàha-nda Dios sàhà ñà-ndùá nì quida Jesús. Vàchi na iin ofrenda xi-nda nùù-yá nduájàn na ndácùcahan-nda quivì-yá, te naquímànì-ndàyá.

16 Daaní, màsà nándodó stná-ndà quida-nda obra xì ñanìtnaha-nda, te chindee stnaha-nda, vachì ñà-jaàn ndisa nduú promesa cudîi ini-yà sàhà-xí.

17 Nsidaa ñà-ndùá cachí nècuàchì idónuu nùù-nsiá, cunini-nsia, te cundoo-nsia sujetu nùù-né; vachì inùù-né nùù-nsiá sàhà ñà-cunduu ñà-vàha xì anima-nsià; te icúmí stná-nè nacuahà-ne cuenta nùù Dios sàhà nsidaájàn. Ñàyücàndùá, cunini-nsianè sàhà-ñá cudîi ini-nè quida-ne chuun ma, te màdiá dacúhúún ini-nsiànè; vachì nú ni cúhúún ini-nè quida-nsia,

mà cúí cunduamà iin ñà-vàha xi-nsia.

¹⁸ Cacán tàhvi-nsiá nùù Dios sàhà-nsí, vèchi ináhà-nsí còò ni-iin cuàchi dandoho-xi-nsí, te iin-ni cuní-nsí quida viì-nsí nsidanicuú tiempu.

¹⁹ Ñàyùcànduá, sacúndáhvî nùù-nsiá ñà-nì cacán tàhvi cuáhà-nsiá sàhí sàhà-ñá chicá yàchì cui nasàí ndé ndoó-nsiá.

²⁰ Ndiaha gá ndoo-nda ñuhiví quidá Yua-nda Dios, vèchi sàhà-ñá nì xitiá nì Stoho-ndà Jesucristu, ñàyùcànduá nì saquin Yuandiaha-yá iin tratu saa xi nèhivì, te nduámà iin palabra mà nunca nsihi, vèchi mate ní xihì Jesucristu, nì natiacu-yà nì quida Yuamáni-yá, te nì sàà-yà nì sàcùnduu-ya Pastor ndiaha xi-nda.

²¹ Te vichi cahnú gá Dios ni sàà-nsiá nihètáhvì-nsiá nsidanicuú ñà-vàha xi-ya sàhà-ñá cui quida-nsia cumplir ñà-nduá cuní-yà quida-nda; vèchi nú ni nácuàhandee ini-yàndó (xì poder ndiaha) xí Jesucristu, dandu vètuni quida ndisa-nda ñà-nduá cudî ini-yà sàhà-xí. ¡Ansivéhé cahnú-yá nicanicuahàn! Amén.

²² Yùhù sacúndáhvî nùù-nsiá, ñáni, màsà cúdúchí inì-nsia sàhà conseju tii sàni tiai nùù-nsiá yohó, vèchi iin ùi-ni palabra nduá.

²³ Cunaha-nsiá, sàni quee ñani-ndà Timoteo ve-hecàa. Te nú ni quésáá yàchì-nè ndé ié` yohó, dandu cutnahá-nsí sàà-nsí ndé ndoó-nsiá.

²⁴ Cásàhùì xì nsidaa ana idónuu nùù-nsiá, cachi-nsiá xì-né. Te cásàhù stnái xì nsidaa gá nèhivì xí Dios. Daaní, nècuàchì ladu Italia cutnahá-xí yohó, cásàhù stná-nè xì-nsiá.

²⁵ Te nsidaa-nsiá, ni cúcúmí cuáhà-nsiá gracia xi-ya. Sà-íá.

Ley saa ni nacoo Jesucristu
New Testament in Mixtec, Southern Puebla
(MX:mit:Mixtec, Southern Puebla)

copyright © 1978 Wycliffe Bible Translators, Inc.

Language: (Mixtec, Southern Puebla)

Translation by: Wycliffe Bible Translators, Inc.

Mixteco, Sur de Puebla [mit], Mexico

Copyright Information

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Southern Puebla

© 1978, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

8a6c83d1-922b-5d25-99ec-4724168f3b77